

寒松堂詩集

一





寒松堂詩集

(一)

魏象樞著

# 寒松堂詩集卷一

蔚州魏象樞著

詩自甲申至己亥

甲申闖賊陷甯武關。周總兵戰死。公諱遇吉。遼東錦州衛人。賊至大戰城下死之。城陷。其妻某氏。督婦女巷戰。矢盡亦死。

大呼高帝出城圍。三百年來此一身。帳下投醪多戰士。軍前拔幟是孤臣。裹尸不愧真男子。擐甲曾聞有婦人。若使將軍猶未死。慧芒那敢近中宸。三月初三日作。

甲申闖寇陷兩鎮。宣鎮朱撫軍。雲鎮衛撫軍。朱兵憲死之。用前韻。朱公諱之馮。順天人。投縵城樓死。衛人。諱家仕。陝西人。投井死。

高懸節鉞鎖重圍。就義從容報國身。關塞千金收死士。京華一臂失儒臣。正當首鼠行蛇日。不愧攀龍附鳳人。三老忠魂稱鼎足。好將生氣護楓宸。三月初九日作。

甲申闖寇陷宣雲。李生若葵。姚生時中死之。李。大同人。闖家自焚。題其門曰。一門全節。姚。宣。府人。投縵明倫堂。遺詩有報國無權。偷生不義等句。

二城三烈相傳久。雲撫衛公。巡道。朱公。宣撫朱公。更有書生義並聞。泮上衣冠懸白日。樓頭婦子蠹黃雲。巖疆謾託專征

將。大事空餘報國文。一夕鼎湖龍已去。不堪揮淚向山君。時余避居天盟山。



理釣無魚次江桂庵先生韻

密柳層隄抱水濱。湖亭小小挂漁巾。團沙結網鷗爲侶。夾岸提壺草作茵。璜夢九秋空入釣。鯉翁千歲欲驚人。半竿明月珊瑚冷。贏得金鈎照玉鱗。

夜雨次桂庵先生韻

如臥滄江上。千濤一葉支。雨迴山氣黑。風割鴈聲遲。易宅心猶悔。時余方卜居翻書念已癡。邊秋淹滯客。蝶夢

更依誰。桂庵先生僑寓蔚州

中秋夜飲北樓次桂庵先生韻

百尺飛樓上。偏宜此夜觴。素心兼似水。邊月況無霜。座影浮天白。山容貼鬢蒼。分來華渚液。清夢溼衣裳。秋夜桂庵先生招同凌十齋許鷗涓飲文昌閣分得稊字

虛閣嶙峋敞不齊。雲光山色晚同躋。霜殘夜動黃華杪。露冷秋飛白鴈低。入座千觥慚壑鼠。憑高萬岫小倉稊。天門未許煙霞客。樓半空燒太乙藜。閣內祀奎星。樓絕頂額曰天門。

漢金波泉流觴限淙字。桂庵先生凌十齋許鷗涓張敞升伯仲園水泛杯風作忽逆流

王氣千年寄一淙。於今猶見舊提封。香分柞葉離宮派。雪老金波代國龍。漢文帝封此曲澗荒邱埋古瓦。孤邨寒樹背高墉。幾回載酒還登眺。落日秋飛掩暮鐘。

甲申除夕集桂庵先生齋守歲次韻

數百年來日無如此夕長。興衰千古促。人物半宵忙。下士身空壯。餘生醉可鄉。數聲新爆竹。驚引斷孤腸。

遊煖泉值凌十齋初度

十齋。粵東舉人。

離亂家何有。南歸不可輕。雲收山氣老。石辨水痕清。傲骨潛龍護。狂吟俠客驚。十年悲瓠落。萬里學無生。

再過彈琴峽

墩轉峰殷斷復連。驅車猶識舊山川。雲迷雉堞孤村遠。翠擁丹崖小閣偏。石第尙留千澗月。冰琴忽冷萬峰煙。三年兩過悲歌地。野水桃花處處鮮。

南口登上方寺

折水通幽逕。蘿煙曲曲封。輕彈遊子劍。直叩大夫松。鶴自當巖識。僧緣出澗逢。吾情耽半壑。不上最高峰。

自嘲

萬事吾何有。孤吟日日勞。才疏青玉案。夢結白雲曹。未識張華佩。空埋仲蔚蒿。半生狂病骨。多是爲秋招。

初入翰林言志

森然古瀛洲。璇室崇欽弈。鼎運闢八紘。濟濟攬英碩。師資帝者尊。鳳虬聯几席。我交海內賢。蘭畹忻相藉。夜半燒藜火。從容翻秘籍。上溯羲與軒。而及濂洛澤。雅志恥雕蟲。至人學有獲。徽猷跋上哲。懷邦軫蒼赤。

慷慨天人間。區區匪所畫。骨格本嶙峋。至性況深積。葵藿弗敢違。圭璧永無斲。黽勉跂道源。願洗天根石。

中秋出師

一夜霜飛萬里晴。爭看節鉞向邊城。銀蟾淨度旄頭影。玉杵高懸笳裏聲。氣捲天河方洗甲。風吹鐵馬欲吞鯨。霓裳曲罷鏡音息。獨有清光照漢營。

冬日早朝

華鐘隱隱列千官。仙樂霏微劍珮珊。煙靄御爐迷鳳闕。氣涵丹陛肅貂冠。虬龍旭照東華日。燕雀風高玉仗寒。慚附詞臣趨拜後。太和惟頌五雲端。

憶母旋里

避溲歸宜蚤。淹留失母心。恐兒牽病骨。頻許寄書音。計日桃花近。地名吾家荳雨深。老母喜種梅荳臨行還誠囑。詩句莫長吟。

送同年喬白山檢討省親歸里二首

劍上宮霞縷縷。樽前御柳圍圍。故國溪山有約。上林風雨誰依。老人暫輟藜杖。遊子輕攜綵衣。奚囊竹硯文石。不卜同歸未歸。

自愧

自愧一侗侗。峻嶮世法中。途寬天地小。才盡鬼神工。七患防何益。三餘用不窮。古今藏拙地。惟有嘖嘖翁。  
送桑笈雲侍御謫杭州

此去西湖是楚湘。行蹤汎汎水茫茫。孤臣掩淚身將隱。倦客臨官病亦狂。泊到漁村休問渡。吹來詩雨謾驚霜。獨憐一片燕山月。不照家園稻秫香。

依韻答楊沁湄掌科兼送歸里

丹心白馬舊朝陽。家世河汾傲雪霜。抗牘爭誇羊祜草。憂時屢獻越人方。何堪去國因封事。竟以投湘失鴈行。回首長安天咫尺。聖明原自鑒愚狂。

夜雨懷同學諸子

必自西峰出。勞勞一夜餘。淡吹榴院小。險入竹牀虛。難續江郎夢。纔寬鄴架書。伊人風雨下。不忍對蕭疏。  
依韻答韓在中同年

鴛湖淼淼一舟輕。愁劇燕山月滿城。得句不刪池草夢。懷人合憶剡雲情。榜發後。同寓天慶寺甚久。浙中海孽仍多事。天下刑官只一平。聞道鬚眉堅似鐵。邇來贏得雪爲莖。

送聶天一同年歸蔚州

又得相逢易水濱。上林霜色滿寒筠。艱危細說官三載。磊落剛消病一身。檻外朱雲心自失。橋邊司馬氣

難馴。壺流處處清堪挹。應念當年釣雪人。

訪畢亮四同年

門前如太古。客到始開關。猛覺煙霜近。猶非竺石間。奇文開奧窔。道氣豁堅頑。此夜無秋夢。應從晤後刪。

弔馮二瑞同年二首

許君身是漢留侯。生死功名未白頭。淚灑人琴無處弔。暮雲深鎖鴈門秋。蕭然北上忽南州。白露尊前話未休。何事邗江歸棹晚。一庭明月冷吳鉤。

贈張綠雪同垣

三尺長髯七尺軀。前身應許是張酺。譚鋒乍接偏驚座。道氣中藏漫擊壺。當世未酬青瑣夢。斯人何幸皂囊孤。撐持今古吾徒事。浪說仙班有大儒。

祝楊半玉同垣

雞舌含香鳳羽孤。宮霞弈弈繞紅繻。時逢拜手颺言日。志在匡王弼帝圖。紫掖雲深趨白馬。青門日近咏丹蒲。祝君惟有千秋事。天下蒼生賴壯夫。

劉公愚同年招飲水亭同九敘半玉仙友石生右君爾執念薰

客夢高寒醉不償。每過先問水亭涼。談杯未冷三分笑。刻燭難消一段狂。積雨易深秋似水。中宵宜靜月

如霜欲歸還訂聯牀約。不是林泉不敢商。

過居庸關大風

鐵障重樓外。山城一界分。狂沙飛落照。墊水抱孤雲。瘦怯冰橋馬。慵題石峽文。出關身已瘁。捧日頌吾君。

雞鳴驛望桑乾

驅馬陂陀古驛。舉杯搖落山城。壯士關門競渡。勞人塞北孤征。乍看老柳春色。愁聽寒雞夜鳴。桑洲泛一槎去。省得浮沈半生。

晚行過白登

泛泛征車暮。搖搖北鴈過。沙吹邊草急。樓鎖戍雲多。好夢歸楊柳。鄉心隱薜蘿。千年遺漢蹟。一夜轉悲歌。

過大同廢城

殺氣孤城黯。頽牆血濺紋。黃沙三月草。白骨萬家墳。劫後繁音歇。愁來野哭聞。車前逢故老。罵賊尙紛紛。

過原平驛讀吳橫溪先生壁間詩愴然有和

先生詩酒自放。疏略世情。權貴利其家貲不得。誣成大獄。事雪。先生亦含憤歿。士大夫惜之。

孤城角動暮砧闌。壁上遺書墨未乾。血到夜看情自熱。劍於秋望氣爭寒。誰云文在天將喪。不謂山頽夢也殘。一日沈冤千古恨。由來國士報恩難。

忻口遇大風

慣習邊塵路。今朝的未經。昏雲穿渡口。烈石走山亭。豈憚王程急。終嫌夜火青。簡書愁病裏。贏得鬢星星。

剝榆歌

黃沙日暮榆關路。煙火盡絕泥塞戶。路傍老翁攜穉兒。手持短鐵剝榆樹。我問剝榆何所爲。老翁倚馬哽咽悲。去歲死蝗前死寇。數十邨落無子遺。蒼蒼不恤儂衰老。獨留餘生伴荒草。三日兩日乏再饘。不剝榆皮那能飽。榆皮療我饑。那惜榆無衣。我腹縱不果。甯教我兒肥。嗟乎此榆瞻我父。若子日食其皮皮有幾。今朝有榆且剝榆。榆盡同來樹下死。老翁說罷我心摧。回視君門真萬里。

鴈門關述所見

邊氣春猶勁。關門草未生。荒陂存漢廟。古寨繫羊城。逕曲隨人轉。山高覺馬輕。九龍亭上字。石斷戍雲橫。

介休訪三賢故蹟

草黯林宗墓。花飛介氏田。也知詢故老。那敢拜高賢。古樹峰煙合。殘碑石雨濺。耆英千載後。誰續潞公篇。

宿靈石縣

環邑皆山。地疲土瘠。居民僅百餘戶。詩以憂之。

斗大居衝要。何人撫字勞。炊煙時斷續。城市亦蕭騷。水近天無夏。山深地不毛。笛聲吹暮雨。一夜旅魂消。

韓信嶺

鄼留終亦死。甯曰假王辜。進食恩難報。通豨事果誣。一邱今自古。百戰有還無。爲灑孤忠淚。山頭草不枯。

望峴巘山

壬午秋。同盛俊侯年兄。約入峴巘。甫渡汾。遂不果。訪漁者村中。捕得大鯉作膾。飲至夜乃歸。

見山如見友。相對忽開顏。竟以神情合。偏教杖屨閒。十年驚戰伐。幾度怯登攀。記得漁邨路。維舟又一灣。

易州懷古

易水東流淚欲波。當年七首暗消磨。城邊尙鎖荆卿憾。老樹啼烏向北多。

至蔚有感

冉冉征雲片。缺孤停驂聊問季。鷹鱸狂名盡。改當年舊。諫草全焚一字無。病後妻孥翻易擲。亂餘城市總堪圖。何時乞得青山許。任卻煙霞老壯夫。時捧詔事竣。抱病將北上復命。

癸巳元旦賜宴恭紀有序

是日朝賀。大宴羣臣畢。上特召內三院輔臣學士。及部院寺卿。國子監祭酒。六科都給事中。各掌道御史。三十四人。賜宴於保和殿。臣象樞長吏垣。得與盛事。上問年問籍。問某科成進士。飲餚皆出大內。陪觀諸國所進舞樂雜劇。瞻仰天顏。喜溢交泰。賦詩紀之。

合殿初收萬國琛。紫微垣內接綸音。風高九譯當筵布。雲擁三台傍闕深。蒲柳氣涵君子日。瞽工情愜聖人心。侍中經席誰堪遜。濫竊銀幡不敢簪。

送王蓼航太史歸養

同年以終養請者。自蓼航始。



拾取煙雲半篋輕。嵩巖卜築豈逃名。十年浪送之官友。一輩初言侍母情。未許參軍忘舊舍。已同司業愛諸生。君歸尙有天涯子。不是離羣淚亦傾。

八月二十八日讀儀郎孔心一奏疏紀之。時余以奏事字有誤檢舉候部議。

左掖回天愧不如。離宮敕下午門初。孤臣待佩承恩袂。素裔爭還議禮書。覆過曹參元宿望。拾遺汲黯肯阿譽。人豪莫惜當廷少。穩載郎官六尺輿。

申臯盟見訪

芥堂高臥眼如冰。百尺樓頭客再登。權掃舊門君有謂。欲留高士我何憑。興言藥餌忘句漏。臯盟授余許可異方。詩人折右丞。一輩論交誰面熟。竹筒好寄白雲僧。

憶山屋舊日讀書於此

古寺連書屋。登臨接梵臺。人歸多見月。客入始銜杯。樹黑雕飛過。峰高鹿下來。不知雲去後。幾處又花開。  
十懶齋自題

歲食并州米。神皋卻是家。世情疏弔賀。吾道隔煙霞。謾綴烏絲簡。空招白雪旌。玦環都有命。蕭散任天涯。  
可亭陳公朗同年題額志謝

客從亭子上。偶爾命名時。一字行藏錄。千秋道德師。簷孤分月小。竹瘦得煙遲。欲待中郎至。清宵共笛吹。

七夕周已穀成我存孫壽周集可亭我存有詩用韻答之四首

愛此亭陰下相將有鶴羣雅追河朔宴騷壓北山文不問三湘月詔來病不至難收五嶽雲剖瓜渾浪說肯逐

俗紛紛

蓼紅三尺許那辨綠莓初似水堪迴櫂無山更卜居白雲封鏡石黃竹繫籃輿不羨袁居士牀頭讀異書

入秋方輟雨昨夜復聞雷白下憂龍亢雲中數上聲鴈來得無碑已碎豈可硯成灰珠米饑長望真同止渴

梅時憂旱家鄉送米未至

逢年無一技懶性自來殊顧影羞韓孟知名溷白蘇病中蝸角細雲外鴈行孤七尺雖無忝難酬育我劬

哭譚評事詔來八首名鳳祜

竟奪斯人去天空老驥羣戶高曾治獄才盡合修文漢水凌抔土燕山落片雲中郎題墓日白石忌繽紛不葬江魚腹羞同鷺鳥羣王喬棺有識賈誼誅無文破館留殘席空庭起凍雲榻前曾握手未覺念頭紛

余語詔來曰心勿有家有身斯有家也心勿有官有官是無身也譚子唯唯

白日瀟瀟雨人兼鬼作羣探奇誰問字緘口莫談文夜聽秋猿哭晴看野鶴雲旅中家祭缺酌酒任紛紛

放開無眼界大塊亦人羣余嘗語詔來曰天在頭上心在腔子裏相去不甚遠耳蚌死珠含蕊麟生筆絕文詔來遺腹育男宦情餘薤露鄉夢等

浮雲天問如終答蒼公日日紛

及門三子過。周芭穀。成我存。孫壽周。痛哭說離羣。地撤康成座。天燒杜牧文。孤魂迷漢口。譚家素紉溼江雲。元伯多良

友。經營事不紛。曹厚庵。經紀後事。

一死終無憾。謀生已不羣。舉家誰就祿。退食只論文。姓字留黃榜。肝腸誌白雲。日昏長命燭。羞照紙錢紛。

朝看螻蟻穴。暮散鵝鴿羣。詔來有胞弟二人。漫寫辭家計。空傳得第文。珠璣連日月。鬼魅失風雲。入世多愁緒。於今

忽解紛。羈魂漂異土。過鴈不歸羣。有墓封和靖。無山臥少文。塵埋三尺劍。哭斷一湖雲。誰說燕臺上。黃金似雪紛。

生日感賦八首癸巳

墮盡孤臣淚。年華剝復中。天勞風雨護。命敵鬼神攻。計日抽簪誤。宏景掛冠年三十六何人折節通。不才辜聖主。那

羨鹿皮翁。

筮得天山卦。投箸祝少微。頻年歸計左。卅月謗書飛。氣化紛難定。風濤靜不違。老親多涕淚。更爲補朝衣。攬鏡如登嶽。蕭然萬壑孤。三秋毛骨立。一榻鹿麋呼。劍鏗天君子。樗根地腐儒。壯懷都折盡。穩欲戢桑弧。僕被吾家例。行行下澤過。客星雙鬢老。恆嶽一峰多。影對孤飛鴈。眉傷屢妒娥。虛名全不避。十載意如何。尺寸何曾報。經年受國恩。室家隨命置。封事與天論。夢乞東陵晚。心傾北斗尊。蹉跎餘病骨。忍淚向高闈。辟穀非良術。鴟夷亦偶然。多情車馬上。獨覺夢魂邊。酒爲看兒舉。書因慰母傳。不辭婚宦拙。俠氣遜幽燕。

挫盡青山氣。吟成白鴈秋。形骸歸藥臼。姓字託書樓。自愛心如水。何妨命不侯。故人雲壑外。音信各悠悠。吾家歸未得。五嶽是誰家。歲月眞蕉鹿。文章亦畫蛇。官閒僮僕懶。舌在友朋嗟。祇合尊狂狷。休令兩鬢華。

祝馬玉筍三章。二章。章六句。一章。章四句。

瞻九畹兮。惟蘭與蕙。彼君子兮。高賢之裔。跂予望之。克承家世。

問彼銓衡。僉曰克當。進之退之。以廉以讓。

公齒壯矣。祝不在齒。匪德曷師。匪道曷履。厥志伊何。願祝以此。

古人交行。爲曹厚庵太史賦。

舉世交情薄如此。厚庵古道猶堪紀。平生至性擬醇醪。所貴道義及生死。而況濂洛學無私。紵衣縞帶誰復齒。伊友譚子曰鳳禎。長而同譜幼同里。筮仕廷評廉且仁。有鵬飛來竟不起。一衾一棺尙艱辛。素車白馬亟相視。含殮已周問家人。側室育男色憂喜。遺珠居然掌上。看可憐蚌去珠無倚。路人匪無乳哺心。躊蹰莫如室中婢。老嫗抱來始命名。名振宗仰天爲祝譚家祀。至今晨夕風雨間。撫摩時向襁褓裏。巨卿有友合淡交。伯道無兒豈至理。君不見漢水湯湯自東流。北邙之下哭聲已。

送畢亮四同年分憲泰安

之官臨泰嶽。誰復嘆風塵。星照東藩路。襟分北斗人。宦情新襖被。王事古綸巾。惆悵燕山暮。雲龍未可親。

馬澧水參戎請告歸蔚州。復有西夏之遊。賦送二首。公先人及昆仲俱元戎。工草書善詩。

四世元戎府將軍。是故山川多戰蹟。兄弟老邊沙。劍鼻黃雲滿。旄頭白日斜。賀蘭知姓字。兒女問萱花。

已愜登臨志。仍尋汗漫遊。馬遲星宿外。家在水煙頭。公別墅屬涑源。愛我情非宦。憐君命不侯。歸來同洛社。咏盡

碧山秋。

成子我存以詩見慰。依韻答之。

馬蹄催雨意駸駸。忽爾遲迴向客吟。身傍玉關仍露待。氣高銀漢復秋尋。鄉思謾託龜兼筮。世網全疏影及衾。賸有餘狂終不改。十年牽碎老人心。

病中魏石生同年惠俸米五斗。志謝四首。

讀書聲接鴈聲孤。日午開門一札呼。明說稻粱恩未絕。不因生事餉雕胡。

舉家食粥分相安。敢向誰門乞大官。自署米鹽三四月。時內人歸侍老母。知君相贈是琅玕。

半燒荷葉半研霜。出東垣十書。贏得脾家有太倉。卻病不須延辟穀。道人曾爲鶴舂糧。

稔知麟脯到門稀。花下留賓典葛衣。不是烏程渾不厭。肯教輕載一船歸。

范烈女輓詩二首。烈女許聘易水田子迺倉。田未娶以病物。女亦服毒死。有海棠變白之異。

力挽天心一氣中。殉花血盡失殷紅。可憐地下從夫女。亦在蕭蕭易水東。

不疑夫而與夫心。生死閨門意獨深。石上幾行貞烈字。更無初念到而今。

武承之將歸里夜話率成四首

十年真畏友。一話慰三生。性至通神鬼。愁來感弟兄。何途窮欲哭。是器晚堪成。自愧登科蚤。胸中更不平。家國都無補。連宵細細商。偶因高士去。益覺野人狂。世法深難問。吾心老欲傷。塞翁曾失馬。何用卜行藏。  
承之善卜筮。

旅況依然是。官衙盡日閒。手摹陶令傳。身臥少文山。筆硯留三昧。冰霜淨一頑。有愁難寄去。只在鬢毛間。吾母知君返。愁予又若何。偶因詩債少。賺得酒人過。舌免多言刺。身從勿藥和。到家煩致語。謫去是恩波。

胡東甌同年自江右歸投詩見過次韻答之

孤鶴飛飛下草堂。亂離纔說覺神傷。一官束帶空南北。十載看雲任白蒼。彩筆共題燕市月。素心還憶塞垣霜。可容洛社人相約。去翦山中薜荔裳。

送陳脊旃齋捧歸東粵

驛路星高拜闕初。袖中曾見石公書。誰從瘴雨蠻煙外。不負綸巾羽扇餘。海國瘡痍真痛哭。王家征戰自儲胥。殘疆莫說君堪借。應許勞人駕鷺車。

王允調同年郵寄海圖詩以謝之

蓬萊閣上神仙吏。公餘著書半遊記。昔日許我滄海圖。一函遠自登州寄。夜來風雨滿空齋。紙上疑有蛟龍睡。晨起展玩形勝多。日月樓臺紛位置。亦有撫琴動操時。伯牙舊蹟何人誌。洪濤初沒兩潮中。狂魚知望法星避。半生不遂五嶽心。十年徒灑江湖淚。安得置身十洲三島間。手把皇石一顆揚。一鱣石子出皇城。形質文彩甚異。紀春曉爲余言。東坡怪石供。或卽此類。

贈陳大孚令遼陽

海內異人誰能邁。我見大孚歡如舊。昔年出宰不問家。及今尙卜條霍岫。喪亂未死必有爲。丈夫恥言鬼神佑。青鞵布襪來京華。十洲五嶽藏襟袖。有時捉得地下龍。有時欲摘天上宿。不然子午元關開。三十六息息息透。大孚亦是吾輩人。異書端自何人授。一斗一叫詩一篇。磊磊老氣橫宇宙。夜來雷劍忽東飛。光芒欲就安可就。君不見葛稚川。自云煉藥乞句漏。又不見祭次孫。久守邊州衣無副。前無往者後無今。單車匹馬辭關右。況有千年華表蹤。歸來好共雙鳧奏。

題蔚州十景

臺山積雪 宮巖夜語 馬頭山色 孤峯獨秀 鐵板分流 靈仙晚照 東湖曉望 井亭甘泉 幽亭集鷓 龜崖橫翠

太白高峰第一孤。誰分鐵板望東湖。靈仙夜答宮巖語。幽鶴時耽玉井呼。谷裏元龜通地氣。臺邊積雪冷天樞。馬頭山色連西北。曾入媧皇煉石無。

除夕憶老母

又是椒花日。嗟哉老大兒。祜親惟拜斗。傳訊自含飴。愧乏終年祿。空懸兩地醫。好看新氣色。仁孝布恩時。

元日。同年李坦園先生惠詩。訂論詩之約。和答。

苟家夜看斗邊星。報到詩來卽啓局。上苑新篇推應制。前宵雅例薦維馨。用賈島祭詩事。誰占歲草豐年兆。獨愧秋蒲弱質零。寄託幽懷春正好。高軒幾日過閒亭。

元日憶老母。用李坦園先生韻。

昨歲萱闈鬢已星。南樓此日倚柴局。書來漫草依親疏。節事單郵貢佛馨。遵慈命也。五世田園今廢墜。六親家室半凋零。白雲一片飛難定。擬額吾亭住望亭。老母治家勤且儉。待眷屬尤厚。抱病以來。不及周顧。故中聯及之。

乙未年諸公外轉有贈

清時簡在每承恩。使節新垂帝語溫。汲黯班行曾有借。魏舒襍被欲何言。夢回丹闕星辰動。淚盡蒼生耳目尊。謝得當朝諸侍從。好將珥筆紀臨軒。

癸巳春送老母歸里。經河堤閱三載矣。再過有感。

堤路慈輿過。重遊只暗欷。白鵝通水氣。黃柳蘊天機。失馬升沈驗。縫衣歲月違。聖恩元不靳。誰滯一身歸。

送同年張伯珩廷尉請假歸陽城

大恩頻錫半公卿。又少中流一柱橫。京兆鼓桴新報績。江淮草木舊知名。三年積雨慈親淚。五月瞻雲孝



子情共說于公眞長者。肯教廷尉倚山城。

湯烈母詩呈荆峴太史

域內畫九州。坤氣厚中土。我聞孝烈風。大者足千古。按狀詢里人。肅衽話湯母。湯母睢望族。經傳稔能補。闔德何其崇。小節亦慎取。所以饋養謀。不厭糠粃苦。比歲值凶荒。寇盜羣相侮。天乎厄皇家。大亂自壬午。衣冠或失身。騶虞半豺虎。獨矢完令名。巡遠直接武。北向矚朝廷。賊辜一一數。慷慨嬰刀鋒。正色奪獯兪。甲申王師來。妖彗不復覩。安知非義魂。化作將軍斧。耿耿邱隴間。深夜鬱風雨。視彼齷齪徒。草木同朽腐。

送楊似公侍御省親歸閩

大雅閩中望。交遊叔度賢。登朝餘痛哭。入里問烽煙。豈念蓴鱸舊。多因戰伐偏。萱闈何地穩。海戍幾時還。豺虎驕長夜。風雷護遠天。乘驄身未老。歸櫂會悠然。

送馮訥生第後省親時紫乙公任江南臬司

羨爾新登第。居然學老萊。世家傳晉土。國士賦燕臺。就日仙舟泛。沿江錦篋開。綠袍兼五色。初向鳳池回。

贈紀春曉光祿

勝友聯冰署。如君更可師。肝腸無曲護。出處得艱危。令伯官難去。馮唐世莫知。十年膠海望。吾道尙存之。

贈劉千里貢士四首

廣濟人。著述甚富。講學漢上。士多師之。

東壁聯荆楚。藜光近石渠。千言名世策。七發古人書。只合隆中望。難從洛下居。鬚眉橫老氣。龍性欲何如。  
大儒生不偶。今日見鵝湖。姓字前朝變。衣冠半世孤。直堪追守藏。去聲甯欲老潛夫。聞說公車後。三湘憶哲  
模。

門下多佳士。猶然拜李膺。園橋新入穀。石室舊傳燈。不負天人問。全因氣運興。自嫌迂拙甚。先謝秘書丞。  
兵火連江漢。高人獨布衣。乍逢新詔出。仍載異書歸。上國驚王粲。中原想陸機。佇看雲壑業。不是宦情微。

與馬孝廉天御

愛爾都人士。居然號白眉。雄文留漢氣。雅句擬韓詩。事業千秋許。風雲一日資。矢將遲暮意。伊洛有餘師。  
送同年聶輯五侍御按甘肅便道省親

皇華十道雨漫漫。親舍依然入望寬。萬里行邊先問俗。幾年待漏忽承歡。重摩鷹角清還要。並策鳩頭健  
且安。下里不知驄馬急。繡衣時作綵衣看。

七夕雨。是日立秋。李坦園先生有詩見貽。奉答。

積雨兼城郭。新涼別一天。千峰黃鵠立。九土赤龍跽。道合詩無忌。秋生帝有權。近聞年穀兆。誰達至尊前。  
時有穀生雙穗之報。

次韻答范箕生

吾道中流日。龍門有客登。投交簪紱少。格物鳥魚興。病骨支燕市。秋懷寫杜陵。臥遊渾不厭。樽酒露華凝。

中秋述懷柬魏石生

執戟君門分所安。那堪節序入愁寬。秋來自覺身無恙。月滿曾經夢幾端。弱婦近年依井臼。遊兒何處覓樽盤。獨憐萬古光明夜。不近高堂不忍看。

周芑穀父七十以壽册索題

君家給事舞萊衣。堂上今年是古稀。世德真能傳一硯。綸書曾已到雙扉。閒看碧海星槎過。每索黃門諫草歸。齒列上庠尤不愧。仙郎清白有光輝。

爲張進士題父節母壽册各一首

明運知難挽。先生竟不存。乾坤多正氣。秦晉一幽魂。直筆輸良史。狂歌慰九原。與朝隆節義。何處薦秋蘩。萱室稱觴日。仙郎出宰時。白雲通華嶽。青鳥出瑤池。北地文星迴。江城畫舫遲。好將新政蹟。先慰倚門思。

送湯泰瞻進士令南漳

險絕南漳縣。看君匹馬行。吏人應佩劍。長者莫談兵。薊野風雲薄。襄江虎豹橫。甘棠思不淺。會與峴山平。

先任常熟有廉聲。士民思之。

五志歌有引

仲秋之二日。倪金吾日章。邀同孫鴻臚嗣昭。王儀部近微。宋樞部霞城。斗酒雅集。循往例也。是日各言所志。既無戲謔。兼有勸勉。余作長歌紀之。

大火西流雷雨迫。長安半是驚秋客。客中有客不可尋。相招一過金吾宅。舉杯未飲說鄉音。邇來白米值黃金。夏逋已多秋令急。靈州況復少甘霖。聞道青驄走上谷。豺狼梟虎不食肉。昨夜猶哭城市間。自分爪牙無遺族。快哉里井矚太平。歲歲好月照邊城。海內願聞歌鼓腹。吾身進退甯關情。客曰人生各有志。嗣昭一呼千人避。世上都說九轉爐。予也學仙不學吏。爲問霞城何所言。塞草無煙白日昏。矢買義田賙萬口。平生溫飽安足論。近微胸次獨皎皎。滿眼相看俱花鳥。一斗一篇興悠然。謾言此外知多少。座間誰稱最少年。日章自顧神翩躚。白馬錦鞍倭子鐵。男兒只欲上淩煙。此時魏生難默默。喉中欲出心轉惻。愧無尺寸答君王。何如老農安稼穡。君不見潘岳奉板輿。當年那羨駟馬車。又不見宏景去神武。迄今隱居化塵土。心如日。口如著。長歌莫教雪兒知。

循吏歌與張開有令棗強。

君不見人籍柔茅水歸壑。慈惠不深俗易薄。又不見羊牽則卻驅則行。峻法徒滋飲食爭。漢廷多少循良吏。政教劃然得其平。張子開有本長者。二十個儻三十雅。自從謁選入承明。堅樸渾如金在冶。相見曾云嚼菜根。俯首雪涕就我言。幼服庭訓矢清白。躑躅反慮辱公門。近日蒙恩殊不少。召入太和瞻天表。尾附

諸臣賜宴歸。金盤玉盃香繚繞。異等忝廁分榮名。何以副之心忤忤。男兒學吏女學婦。得無一指臨蒼生。愧予難悉作吏苦。惟嘆今人不如古。古人愛身今愛官。此身一失官何補。以爾素性甘清貧。滿眼瘡痍繫爾身。榮辱得失天所主。豈肯擢民媚他人。民乎民乎盡殘喘。頻年水旱多展轉。功令初嚴匿逃家。生怕吏人驚雞犬。棗壤況復接二東。大盜飄忽勢難窮。鈴柝夜聞城市肅。狐鼠乘隙不敢訂。諺云賈人有牛庖人割。用剛用柔吾自掇。佇望循聲滿恆陽。傳中猶紀真衣鉢。嗟乎初志如山不可奪。

單拙庵同年省親還朝再請終養

共有陳情意。君今得再歸。應知頻上疏。不忍又縫衣。祿薄親心得。家貧客夢稀。傳來詩句好。北鴈正飛飛。  
公有歸山詩六首。一時傳誦。

訪同年趙錦帆比部

淹留不敢問。醉後淚雙垂。作賦才難量。爲郎宦獨遲。春雲孤少室。客夢老燕支。最是元龍輩。交情若有私。  
重陽後一日。訪李退庵侍御。閤者以病辭。作此訊之。

釣石瀕江不可溫。又經風雨動高原。自封丹葉秋臨帖。獨擁黃華晚閉門。柱下有人新日月。座邊無闕古乾坤。謾將詩句邀山簡。共倚書牀擊大罇。

送季天中給諫徙上陽

掖垣封事下秋官。責爾疏狂敢自寬。臣罪尙餘千古憾。主恩猶賜一家安。廣陵雲起遲遲望。鐵嶺風高細細餐。直北六星何處照。老親終日倚門看。

前題和王似鶴先生韻

初心那敢薄淮陽。此日眞同華表翔。萬里孤臣空灑淚。中朝美事自垂裳。天高祇見霜華白。地絕平吞月氣黃。出塞諸公今亦老。共看留守射天狼。

前題和桑笈雲先生韻

檻車東去晚秋天。彷彿西湖范蠡船。終日踈稱君萬壽。百年思報母三遷。好將書卷樓頭護。自有風雷海外懸。迴想津門封錦纜。小臣方信是訛傳。

前題和魏石生先生韻

漢廷喉舌禁多疑。況屬君王座右詞。午夜燒燈癡僕語。幾年簪筆諫臣思。忠州自合行醫便。儋耳曾聞赴召遲。幸得一身還許國。鷓鴣行莫爲故人悲。

答周伯衡掌科枉過可亭次韻

草色花香亂不鋤。市朝猶卜野人居。高軒入夜驚皇甫。舊牘含霜拜史魚。素髮悲涼猶細細。冰心拓落自如如。十年珍重燕山客。讀得新詩卽道書。

送薛彤許分守河東

公舊按宣雲

昔年塞北乘驄出。今日河東杖節遊。白簡清霜知按部。新詩濁酒憶登樓。路迴王屋家堪問。身近高堂涕欲收。出處莫增今昔感。蒼生何地不關愁。

贈張行源有引

行源尊人九萬公。以新喻令值金逆之變。罵賊不屈。賊手刃之。妻妾弟媳皆遇害。時行源隻身扶櫬。艱阻備嘗。萬里無恙。余與行源官光祿。聞頗悉。敬而賦之。

先世幽光迴不回。蓼莪聲斷也哀哀。半生血淚雙孤盡。九死風濤一櫬來。人識忠門多令子。天教寒暑老中材。應思他日酬恩地。清白還從節烈開。

歲暮與魏公度

舊作關門吏。驚聞道氣深。如愚長者貌。無欲古人心。柏葉新將煮。梅花老更吟。行年正強仕。趨向每駸駸。

送同年衛澹足水部

三月孤舟穩。攤書到白門。鶯花資耳目。雲樹滿乾坤。水國籌方大。名山道益尊。願追先輩業。一卷細評論。

時攜鄒子遺書付梓

寄張開有示勉

百里絃歌四壁春。千秋直道在斯民。每當中夜焚香處。應念高堂白髮人。

酬田髯淵孝廉

海內風雲歸此日。廬中抱膝屬何人。大江行地堪經緯。元德先天自屈伸。萬里間關無俗夢。九州聲氣有同倫。我來欲讀新詩句。白鶴沙鷗未可親。

送周芑穀遷兗西兵憲

數年通籍後。今日始臨民。器使歸仁主。分猷體大臣。霜清狐穴閉。河塞蟻堤新。不改梧垣素。聲名慰老親。

追贈呂新吾先生呈減之同年次覺斯先生韻

不到藏書閣。高風那可尋。嵩雲秋漠漠。洛澤晚陰陰。道絕中原憾。天留萬古心。家聲還不墜。麟鳳有遺音。

酬郭臥侯同垣二首

邊城斗大推廉卓。海內文章屬臥侯。從此相期惟太上。公餘每上讀書樓。

曾向垣中讀諫書。少年賈誼近何如。一時言路多君子。還爲蒼生鬢髮疏。

贈絳州馬季常先生

霍下披裘矚太虛。從來絳縣有仙居。堂前草色垂新帶。帳外經聲接素閭。湖海但容高士臥。煙霞真滿異人裾。生兒已自承家學。猶勝柴桑不讀書。



送王近微同年分守慶陽

腰下吳鉤久不懸。重看畫戟出幽燕。神明有定詩堪筮。功令無私宦亦仙。評吏夜張青玉案。省耕春駐白雲阡。明年鴈叫桑乾曲。知和先生第幾篇。  
公應堪任養民之舉。特轉監司。偶以詩卜。得慶陽亦是先王地之句。遂知爲讖云。

送宋霞城同年分憲荊州

車過荆門柿未紅。南人卻欲識韓公。衣袍自浣三湘月。豺虎空驕萬壑風。好友夢隨長缺去。老親家在白雲中。平生血性知難減。定有剛柔濟世功。

壽嚴太母呈灝亭掌科

吾聞吉人之壽德爲基。嚴氏豎德山不移。閨中阿母稱嚴師。六月六日酌金卮。金卮初進色委蛇。欲飲未飲心憂思。憶昔十五始結褵。聞說清白家訓垂。堂下井臼親操持。篋中簪珥不敢私。四十年來苦如飴。此意須教兒孫知。爾時酌酒復進辭。自兒捧檄甘旨虧。有祿侍免八口饑。士安板輿何能爲。老母聽之轉怡怡。爲喜生兒際良時。蚤讀中祕侍丹墀。天子書名列罟罟。重許左右職諫規。白馬騎出梧掖遲。讜言更與家聲宜。酒卮三進匕箸施。諸孫遠膝歌龐眉。予也有母久別離。行年望七髮絲絲。欲就升斗筋力衰。門閭日夕生千悲。書來但呼不孝兒。嗟哉嗟哉不孝兒。范式堂前拜老慈。

拜疏

齋沐中宵起。燈光復爛然。十年遊子淚。兩疏聖人前。令甲垂星日。肝腸託地天。綸音何日下。爲報白雲邊。

辭朝

曉騎趨天陌。平明拜紫微。敢言違帝座。聊得奉親闈。輦下風雲重。山中藥石稀。此行歌聖澤。清露滿朝衣。

抵蔚

依舊天涯子。家鄉只暫過。一官勞日月。雙淚出關河。市井黃塵暗。親朋白髮多。不才應瓠落。強仕復如何。

見母

十年離故土。今日傍庭萱。嘻笑偏多淚。風霜不忍言。幾人憂仕路。八口賴家園。解得高堂意。平生識聖恩。

侍藥

疾病關兒女。堂前合自傷。未看鳩作杖。誰信髮如霜。戊己生成大。參苓氣味長。東垣知妙理。今古憶良方。

時以補中益氣湯加竹瀝服之頗效

進封

樗散中朝列。承恩膝下身。詔書經六載。封典及雙親。數世門閭舊。全家翟芾新。合當慰慈母。北向祝楓宸。

病中送翁涓公直指還朝二首

絕代文章漢大儒。親承特簡出飛狐。乘驄問俗驚神鬼。攬轡行邊入繪圖。春雨自生寒谷潤。冰心惟指大恆孤。還朝定有新封事。塞上風霜次第蘇。

幾度停車問草萊。邊人何處識烏臺。九宮佳氣王臣駐。三殿直聲使者迴。穴裏豺狼終伏避。蹊前桃李合爭開。獨憐肺病牀頭客。空羨鸚鵡班濟世才。

李世唐兵憲問病榻前志謝

百年生死道何如。半世升沈付子虛。榆塞幸聞長者屐。蓬門忽枉故人車。一官去矣懷安託。公將謝事吾道行乎鬢已疏。回首君門多涕淚。不堪重上乞骸書。

沈茶庵司李以詩問病次韻寄答兼送二首

歸來重話十年前。落落行藏坐一疏。已謝笏頭京兆筆。合添屋外杜陵蔬。曲全骸骨惟封事。消受恩光有賜書。況是輞川能愈疾。不愁明日又河魚。

滿筒詩句敵黃初。旗鼓中原道未疏。食粥魯公猶乞米。去官元亮祇茹蔬。自從當日題佳士。曾向何人得異書。身到衡陽休北望。最關心處是鴻魚。

仰海川參戎問病榻前志謝

關外清風挹戍樓。幾回腰下看吳鉤。控弦李廣真猿臂。食肉班超自虎頭。信是三軍司命主。還當九塞立功秋。近聞臺使書名姓。獨許登壇在蔚州。

郭元庵兵憲抵蔚問病志謝

共倚梧垣待漏遲。而今歧路各相思。蛾眉豈合時人見。駿骨多因聖主知。汲黯淮陽心不薄。賈生宣室召何疑。懷中舊草應無限。會看爲霖濟遠陲。

蔡介磁太守問病志謝兼訊敬候

豐城雙劍起蓬萊。召杜風流亦快哉。鳧鳥舊從嵐縣去。鹿車新向鴈門來。凋殘風土真堪繪。惇大朝廷不計財。一自茂陵人臥病。懸知雲塞有春臺。

病中和徐雲門見懷韻二首

自買青山卜築初。閉門五月故人疏。奉親潘岳亭爲御。余構亭子名與好客崔瑗飯亦蔬。萬壑難償雙闕夢。十年

空貯一樓書。期君共理元亭業。病眼模糊溷魯魚。

一冬僵臥又春初。華髮驚看日日疏。道士鶴糧供蓐食。鄰人菜把足盤蔬。閒抄李密陳情表。懶讀長沙痛哭書。此舌幸存吾足矣。更無福命佩金魚。

孫鴻臚嗣昭捧齋事竣過蔚

同下承明侍從班。君來天上問天顏。朝廷大赦中原望。使者嚴程故國攀。幸有春光留紫塞。轉憐衰病臥青山。一時京洛諸公好。回首依依魏闕間。

朱山輝僉憲問病榻前志謝

文園寂寂病何如。篋裏曾無封禪書。北塞關河空灑淚。故人風雨一停車。中原拙宦潘生老。下里狂名阮籍疏。一自使君來上谷。風流還記五雲初。

山中隱者潘藏山至蔚

家住烏龍第幾峯。忽來城市亦奇蹤。藏身豈合稱門卒。避世將無作冶傭。十畝高雲犁欲破。一簾飛瀑戶常封。知君久是青山主。野鳥溪花盡附庸。

聶天一卜居新構亭子走問

收盡蘿山萬壑雲。平泉今日定輸君。安排野逕隨天趣。指點晴嵐到夕曛。幾處可容人共醉。就中只有夢難分。欲扶竹杖尋幽迹。花鳥應嫌耳目紛。

檄催補官知告病之請未允感賦柬聶天一二首

檄書昨夜問東山。感激中朝淚欲潸。萬壑煙霞成痼疾。十年樗櫟誤清班。忍看溫嶠辭親去。竊效周顛奉詔還。最是升沈難定處。白雲滿地一賢關。

客路荆榛已自傷。又看綸綍下明光。勉扶幼子辭花逕。細囑醫人檢藥方。狂客祇宜歸鑑曲。病臣何用臥淮陽。亦知此去承恩易。卻恐慈闈涕淚長。

拜別先塋

白日烏鴉樹樹悲。椒漿奠罷復陳詞。十年京國羞溫飽。累世家門識孝慈。夢裏猶驚人欲殺。歸來祇念帝無私。行藏拓落先靈祐。敢效王家誓墓兒。

別兄

那得兄前一語無。郊原黯黯病相扶。封侯命薄應無禍。負郭田荒尙有租。好辦蒸嘗司栗棗。漫傷時序插茱萸。行年五十須珍重。佇望書來說蚌珠。時兄年近五旬。尙未立子。

丁酉再入都門 七月二十三日

居庸關下水悠悠。拱化城邊望鳳樓。九陌雲高開邸第。四郊風動走驄騶。還鄉司馬身難定。奉母安仁志欲酬。衰病不禁冰雪淚。上書仍傍帝王州。先是請告。部覆未允。

讀張譙明都諫斗齋集。有送趙錦帆詩十首。因問錦帆去國之由。

入國心驚去國人。秋光滿地白粼粼。何年誓墓身將隱。自古書空事必真。少室三秋雲淡蕩。黃河一鴈影逡巡。徐公不忍辜臨賀。得句篇篇繫逐臣。

送同年張東山少司寇養病歸里

同是天涯臥病身。送君歸去忽沾巾。少年兄弟今餘幾。九列功名合讓人。夢裏青山仍素業。風前白鴈自勞臣。社中諸老如相問。時綠雪白山。伯珩里居。爲道疏慵復下陳。

送郭臥侯掌科分憲西甯

經年肺病臥山城。入國心懸白馬生。近日淮陽多給諫。幾時關尹過西京。種花老吏風如舊。視草諸郎淚欲橫。一路秋雲隨騎足。遐邊處處想澄清。

和韻答聶天一見懷二首

卜築官巖深復深。門前柳色正陰陰。高人會倚千峯臥。客子空懸萬壑心。豈有才名稱獻替。全將宦迹付升沈。秋來頰首燕臺上。三月曾無一字吟。

東來馬首怯巖峴。況復關心事幾端。白髮數勞鄉國計。黃雲晚散帝城寒。交聯杵臼應難恕。命寄參苓敢自寬。惟有晨昏堪慰藉。年年鴈字報平安。

和韻答徐雲門見懷二首

長安風雨自如如。門設常關十懶居。九月詩來君有藥。中秋鴈去我無書。兒生客裏慈顏好。夢到雲邊宦迹除。記得蘿山同問夜。滿天霜氣一亭虛。

晨昏碌碌不相離。已忘去聲秋風壺水涯。千里低徊兄妹在。一官消受鬼神羈。余病甚。援詞林汪公例。撫按代請調理。部覆無例。仍催赴補。

既扶病入都。始知汪公覆准在籍調理久矣。殆鬼神用事云。向人啼笑應誰主。幸我疏狂蚤自知。拾取古今成法戒。邇來無暇更吟詩。余有古今

嘉言錄之。還未竣。

送周伯衡少參齋捧事竣歸蕪湖二首

碣石春寒二月初。故人騎馬過閒居。無言但問萱親好。別後惟看素髮餘。江上魚龍能寂寞。日邊風雨自蕭疏。一時同學東南少。退食堂中獨著書。  
車過石城梅柳春。樓船相望大江濱。懸知風俗移諸郡。況說官僚見美人。關塞雲荒鼯鼠叫。荆湘水闊鴈鴻親。多君不負臨軒意。南北悠然舊諫臣。

珊瑚棗

海上安期信有無。西來棗子是珊瑚。秦風謾取形爲號。戴禮空傳婦獻姑。酒後拈將甘似蔗。皮間摘去核如珠。當年薏苡猶滋謗。愁絕斯名又被誣。

哭中書湯子二首

名衍中

館舍蕭蕭白日寒。忽驚箕尾去長安。九年甲榜終身事。五月中書一命官。卻幸生兒難記誦。可憐先世倍艱難。才名寂寞湘江冷。數卷遺詩不忍看。

兩度京華哭楚人。

先是譚詔來卒於官

百年未半總傷神。乾坤拓落江聲苦。生死蒼茫客路頻。馬氏漫言多令弟。絳

侯空擬是前身。堂邊藹藹春風起。吾道中原恨轉新。

喜武承之至



一度君來一快吟。吟成歷歷故人心。謀身自得希夷數。學道仍懸夜氣箴。雲過小亭依瘦竹。鳥鳴高樹惜層林。此番莫說輕歸去。北海西山正可尋。

老母歸里紀事 戊戌四月二十五日

自秋徂夏二百日。去住間關神倍傷。弱媳扶持事碌碌。遠兒留滯情皇皇。行藏幸不違盛世。菽水空煩支太倉。灑淚牽衣聽慈訓。讀書閉戶青門傍。

送張鏡一秀才問業歸蔚

坐得春風一月無。蕭蕭竹影共吾徒。氣通天地文人貴。行過關山大筆孤。未許才名知狗監。不妨心印接鵝湖。他年事業終期汝。萬里雲霄是壯圖。

聶天一入都補官有感

半畝園開素業初。園名飄然一劍欲何如。詩傳白社俱成淚。客夢青山不敢書。猿鶴依人還寂寞。風雲滿地自躊躇。年來拚向金臺老。種秫栽花事總虛。

王近微同年請告歸里初構草堂成索詩

壯心曾未許煙霞。彈鋏歸來鬢欲華。茅築依城渾是懶。青山當戶若爲遮。衣裳盡染風雲氣。事業平看草木花。早晚詩人相過處。更無車馬到君家。

余既入都。詢知工科散公逝。哭而輓之。

急雨高雷聽不勻。同君問夜幾經春。如何塞國登朝日。不見西垣抗疏人。無地可拋兄弟淚。有書難問死生因。從龍多少英雄在。痛惜中朝一小臣。公名散都。滿洲人。存心忠直。論事動以古諫。臣自期。同垣交。余與姚若侯尤善。

都門贈田髯淵次韻三首。

日闔柴扉客不疑。水濱茅築慣棲遲。著書班馬今無事。應世夔龍自有爲。薊北山川雲出後。江南風雨夜深時。從知逆旅悲歌盡。十載狂名半篋詩。

才名藉藉動朝紳。賸有詩篇託鴈臣。長缺久虛金馬詔。孤燈晚向秣陵親。何堪華髮中原老。不愧青雲半世貧。顧我年來消渴甚。每從伏枕和陽春。

相思日日問籃輿。杖策驚聞傍玉除。乞米漫投顏氏帖。買舟應載鄴侯書。何妨世法周旋少。轉以交情會合疏。百尺樓頭豪氣在。無門更肯曳長裾。

送張譙明掌科遷蕪湖分憲

燕臺五月火雲浮。有客承恩采石洲。袖裏諫書還落落。日邊詞賦總悠悠。幾年風節歸吾黨。一部樓船控上游。舊是西泠真地主。熱腸一洗大江流。

送朱山輝臬憲自宣府移登州

攜得清霜入塞垣。東南一望法星尊。蜃樓飄渺迎仙旆。憲府崇高壓海門。不使鼉鼉乘浪出。好將日月帶雲吞。傳聞部內多良吏。詩句何人可共論。

聞曹翼辰銀臺請告

同朝同病不同歸。聞道先生竟拂衣。清節祇應明主鑒。熱腸贏得宦情違。幾年瘴雨催人老。一片燕雲向客飛。疏上丹墀何日報。西風遙望正依依。

送張爾成侍讀分憲青州二首

青海茫茫接二勞。侍臣東下一垂囊。車前檄到波臣靜。座上詩成蜃氣高。會看諸僚飛漢舄。休誇舊日賜宮袍。西風北鴈聊相問。何地文章有鳳毛。

重思把酒慰賢勞。收拾風雲入韃囊。京國此時方看月。驛樓何處一登高。旌旗曙色連金馬。島嶼波光上錦袍。痛哭蒼生無限淚。肯教諸吏更吹毛。時聞所部有墨吏。

李琳枝侍御以言事再下詔獄未幾復官賦此慰之二首。

埋輪曾過大江濱。謾草封章復此人。磊落百年還幾事。疏狂萬死一孤身。皇天默助垂衣主。聖世偏容折檻臣。滄海恩波終欲報。太平時節莫傷神。

聞君數月缺薪水。愧我經年祿食違。清白關西仍問夜。談諧曼倩已長饑。台星自繞天王座。湛露重沾御

史衣。最是小臣風節好。廟謨今日更巍巍。

烏鳥簫祝頡萃西母七十壽

朝朝烏鳥飛。飛來鳴高柳。一鳴一迴顧。聽之欲翹首。我愛頡戶曹。十年稱素友。堂上有萱親。庚甲同我母。戶曹說懿行。我亦述慈厚。頡母性溫柔。善氣時在口。我母和且莊。語笑弗肯苟。頡母勤家事。寸績不去手。爰有服勞人。稍爲釋井臼。我母崇儉德。門內如官守。欲留座上賓。方翦園中韭。頡母胃氣強。曉食過申酉。我母雖善飯。午後須步走。頡母就祿糈。有兒依左右。旣慰萊子舞。何須仲由負。我母念兒貧。爲兒饋升斗。有夢來京華。問視惟少婦。頡母眞賢哉。我母德相偶。頡母值古稀。理道知可久。戶曹捧霞觴。我爲歌黃耆。王事豈多艱。錫類感元后。轉盼我母辰。西望三酌酒。持此菽水情。共祝康而壽。

徐靜庵戶曹同李退庵問卿過小齋坐談和韻二首

歸朝無一事。有客問幽栖。李郭登舟晚。羊求入徑迷。江湖元拙計。花鳥自新題。念此昇平日。山田好插犁。竟日同君坐。如觀武庫森。無言非大藥。有酒覺空斟。不立千秋上。難平萬彙心。頻年憂二豎。能復暗相侵。

九日坐李退庵問卿齋中詢其舊按湖南情形二首

祇爲登高出來君退食堂。書聲迴蠟屐。雨氣入花廊。臥病追隨少。蓬秋涕淚長。清談須有濟。法度及文章。今日逢佳事。諸曹應制回。是日上傳部屬二十人。親試改授。求賢歌盛代。對友惜深杯。卓午雷聲急。停雲霽色開。復從花底

散。騎馬抱書來。時攜退庵文稿歸寓。

贈黃心甫

海內知名姓。重來慰所思。著書燕市滿。入座大江移。菽粟元真味。文章恰盛時。晚年心力好。吾道一維持。

贈殷伯巖

吾友申伯子。遜迹南山巔。把臂有畸節。風雨相盤旋。秋來貽我書。爲言魂夢牽。勞彼肝膽人。顧我金臺邊。曠達不常有。清白繼高賢。幸無冠蓋束。酌酒忘歲年。平生聞道要。知名匪浪傳。申子肯吾欺。對爾思悠然。

次韻寄懷申臬盟

懷人多不遂。落日大河濱。地接川原氣。天留著述身。夢中吾欲老。雲外客誰親。彷彿行吟處。浣花別是春。

寄訊袁丹叔太守兼懷同年畢亮四大參

溪山無恙好行春。太守年深鹿亦馴。租賦敢云書上考。兒童漫自說清貧。施長也。王文二。史筆公。

俱去任。

節使登車幾故人。

畢大參自粵入浙。

爲念拾遺多病後。滿籠風雨過天津。

時以石斛何首烏見貽。

送同年翟象陸大參自江右移秦臬

天下皆吾事。斯人豈易尋。夢留章水闊。車過太行深。充國屯田略。文翁化蜀心。西京猶可返。風教日駸駸。

送同年解法周遷池州太守。卽用見別韻。

一陽傳令節。中夜氣莘莘。小雪催寒蕊。停雲護老枝。正當求友日。恰際拜官時。太守推人望。司農邁等夷。文章須豹變。風格自魚麗。作珮思蘭茝。防身問蒺藜。昭明遺舊蹟。杜牧有前規。畫舫登南國。麟符出右螭。蒼生方欲起。長吏更何爲。每矢清如水。休辭苦若飴。催科王事急。撫字內廷知。政以桑麻見。情同婦子嘻。敢忘三尺法。未報百年慈。有鴈書難寄。爲熊夢可期。褰帷周綠野。賜服憶丹墀。先令濟陽。舉卓異。賜衣。愛馬先祛蠹。觀風只採詩。九華青兀兀。二水白漪漪。願爾追廉范。憑人說項斯。虎狼能寂寞。鬢髮各差池。碑碣功名淺。關河聚散遲。贈言千古意。毋老是吾師。

次韻和宋子飛同年齋中竹影

此君清節晚疏疏。況是搖風映月初。千个細臨高士榻。一窗寒動古人書。渾疑拄杖探雲壑。便合爲家結草廬。萬彙齊觀都是影。秋來珍重不須鋤。

酬紀伯紫次韻

不同香火亦同心。雞黍留連氣鬱森。都下幾懸邀客榻。山中未報買書金。詩傳紫塞風塵隔。雪點紅爐願力深。數載一人今始定。何勞市上碎胡琴。

問韓固庵病。兼訊選先儒格言竣否。

大道愁何有。蕭然病亦侵。讀書猶故迹。無欲是天心。垂老文章細。平時意氣深。春風留一座。萬古識元音。

送嚴灝亭掌科請假省親

共識梧垣有鳳麟。如君風節倍嶙峋。傳來諫草俱王道。網得名珠是國珍。典山左試人文最盛白水盟心期後輩。紅雲捧詔慰先臣。還朝好奉慈輿出。莫向湖邊問釣綸。

送陳天絨儀部遷長沙太守次韻

道在如家在。何時不可還。一腔春藹藹。百派水濺濺。物我原無界。行藏自有天。報君千里去。吾欲託鴻肩。

次韻答魏石生同年雨中見懷二首

總不計晴陰。何妨旅病侵。十年雙淚眼。四海一丹心。序轉無歸鴈。天荒有落禽。故人勞問訊。春色滿雞林。纔知惜寸陰。無奈二毛侵。失學頻年事。埋名此日心。春風歸雨雪。夜氣轉人禽。如此衰庸客。應嫌寄上林。

送桑笈雲先生自粵西入覲移河南方伯

肆覲初懸桂嶺圖。又瞻嵩嶽一馳驅。朝端舊識真驄馬。海內誰稱古大儒。自有屏風書正直。肯將經術等虛無。嘯臺咫尺孫登在。碧水青山道不孤。孫鐘元先生讀書處

寄江桂庵先生自蔚州歸里仍用前韻

灑落襟懷異地同。又看歸鴈借天風。峰迴少室人如見。水隔黃河路不窮。何日過門窺大隱。幾年尸位愧羣工。名珠入掌曾相問。竚望書傳蔚塞東。

題雕邱督稼圖贈同年梁葵石光祿

青山碧水古雕邱。督稼圖中足臥遊。歲月喜從戎馬得。煙雲況是祖宗留。百年心事堪偕隱。十畝風光已坐收。冷暑秋高相憶切。知君佳興晚悠悠。

酬徐子星掌科次韻

隄外飄飄綠柳垂。閉門焚草幾人知。喜當朝宁清明日。況是言官戀直時。衾影真修期我輩。旂常大業許來茲。君方盛壯吾將老。滿眼燈花寫一詩。

懷易子然。卽題白鹿書院二首。

子然所建也。

獲鹿風流宰。逢迎事幾端。月臨飛驛白。春入講堂寬。綠柳隨花種。青山逼座看。公餘還駐馬。處處問艱難。易生才不小。蕞爾尙淹留。定有神明號。真無學術羞。百年吾自慰。六字爾相求。余有六字箴。曰循理守法安命。知己多搖落。加餐報蔚州。

次韻答同年馮易齋先生見過可亭家兄與坐。

可亭重額望雲亭。況復亭前聚德星。客向金門逢骨肉。人從鹿洞想儀型。幾年矜字方能去。是處狂言不敢聽。惟有清剛宜盛世。寶箴應獻御前屏。

送孫壽周奉使江南蘆政



仰視天爲衡。俯視人爲鏡。天人有至理。識者起深敬。近愛孫水部。澹泊出至性。一日知爾言。十年知爾行。菽水報堂上。此外無他競。昔從荊州來。念念缺溫清。立我可亭傍。相對心如柄。及今使江上。矢志答明聖。蘆洲雖民力。課足民何病。錙銖不可問。惟恐資梟獍。出入慎所司。寬嚴爾爲政。從此隔千里。過失誰相諍。吾道重剛毅。吾生本孤勁。天乎非人爲。行法以俟命。

松江太守行

松江太守李正華。頌聲傳播國人誇。或曰留錢飲江水。器俗化桑麻。或曰權貴無私謁。豺虎失爪牙。餅粟斗酒事上官。上官一拜一咨嗟。雲間紳士如同口。尸祝況聞百萬家。丙申大計冠羣吏。郡邑逋賦悉責備。鑄級條爾列姓名。手把邸抄不忍視。臺使李公上薦章。李公諱森先部民罷市情。皇皇山公啓事具成例。江上空留勿翦棠。歸來附舟衛水部。僕馬蕭然過江浦。水部伉爽言匪欺。益信循良無今古。十年爭羨太守賢。千里思齊太守伍。廟堂格外多恩威。孰功孰罪堪悉數。君不見受金侍御服極刑。倒戈南人錫茅土。太守太守安得把臂說平生。遭逢盛世猶躬耕。吁嗟太守胡自輕。

送同年楊雪嵐少宗伯乞假送太夫人歸里

昔年同望白雲飛。今日忻看畫錦歸。聖主施恩先菽水。大臣爲政亦斑衣。車來碣石情方愜。路過黃河夢已稀。遶樹慈烏空自慰。那能無意向春暉。

午日有感

退食端陽日。關心白髮初。著龜何處問。藥餌幾行書。禳毒沂公惑。酬恩李泌疏。皇天高可鑒。君子意何如。

與同年張伯珩登樓講學

造化珍元氣。大道傳真剛。維持天壤間。五行兼五常。我年過四十。中夜多徬徨。空質寡實力。安得狷與狂。知者誰爲言。徒使淚沾裳。卓哉張廷尉。鍾靈析山陽。妙齡備中和。長者心難量。指我知命說。贈我守身方。一字一藥石。學豈在深藏。有過期共白。片善渾相忘。賴此至性人。幾希免自戕。嘗聞古儒者。三才藉匡襄。樹德通萬類。華國本天良。君爲董仲舒。日月饒輝光。余也愧薄劣。泛泛逐巖廊。屋漏不可欺。六月懷冰霜。次韻答韓固庵枉過可亭

但得高人過。他鄉卽故園。無雲遮月窟。似雨濯天根。鬢髮崇朝改。乾坤一息存。羨君湖海錄。重與細評論。爲上谷席秀才兄弟壽母

席家兄弟好。奉母不分居。十畝秋供饌。孤燈夜讀書。風塵雙鬢少。日月一門舒。歲歲中元節。忻然御板輿。金母九十爲君彩。縣丞志喜

安仁雖小吏。九裘母堪欽。千里孤舟路。十年寸草心。雲飛金粟近。鴈過洞庭深。自畫斑衣子。堂前報好音。

君彩善丹青。

懷友

坐對西山色。懷君洛水濱。兩河風俗侈。三晉性情真。耕鑿歸元氣。輸將念小臣。相期千古事。六月飲冰人。

送同年王藉茅復補涼州分憲

江東雲物等閒過。又看征車渡渭河。一代風流詞賦老。頻年閱歷苦辛多。防秋漢使瞻鴻鴈。入款番人貢橐駝。不負生成今日事。玉門長嘯記恩波。

送李毅可少參分憲大同

雲中古戰場。今日亦殘疆。問月逢秋白。行邊度草黃。風流羊叔子。仁愛段文昌。佇看星車到。民巖祝樂鄉。

送許傅巖掌科省親。余方終養。即用見贈元韻。

漸覺西山爽氣闌。此時秋色且同看。雲邊待命黃封降。輦下分襟白水寒。儻過蘇門尋大隱。莫忘梧掖指中官。歸程十日君先去。料得高堂夢已安。

侍養得請再出都門。己亥八月初二日

出入班行十四秋。曠官竊祿總堪羞。疏狂每荷宸心鑒。毀譽應勞太史收。在帝股肱真濟濟。歸家菽水敢悠悠。叨承錫類恩非淺。北望星辰是鳳樓。

# 寒松堂詩集卷二

詩自己亥至壬子

己亥秋八月再入里門見母用前韻

兩年何事鬢如秋。祿米難將更可羞。手內縫衣今尙在。池邊餽鮓幾曾收。艱難國事經營少。清白家門歲月悠。拜母先稱天子孝。朝朝問寢出龍樓。

戚台衡同年分憲雲西。枉札見問。因寄。

都下分襟歲已移。蔚蘿煙樹報君知。喜當塞國秋高日。回憶僧房夜話時。徑外黃花今得主。堂前白髮幸看兒。五雲西望星文動。願借餘光照短籬。

老母七十一誕日紀事。是年歸養。

上疏辭丹闕。承恩祝壽眉。玉音千里頌。鳩杖滿朝知。漫藉參苓護。行看鬢髮移。九重何日報。耕鑿際良時。

喜徐雲門至蔚。次小關嶺望蔚韻。

岔嶺迴環數十峰。重來把酒賦江東。懷人漫待三春柳。問道真慚一月風。徑訪茅廬忘下榻。獨乘羸馬抱詩筒。年年京國愁雙鬢。此日升堂獨老翁。

雲門將歸白登賦詩別余次韻慰留

交情十載半圖書。每見伊人慰索居。今夜鬼神歸授受。滿懷天地識盈虛。星光燦爛分東井。酒氣溫和溢入閭。願得山翁留數日。黃金白璧欲何如。

寄訊沈茶庵司理罷官用前韻

南去瀟然合遂初。北來依舊是狂疏。獨令詩友添新恨。可得園丁送野蔬。雲塞浪傳三箇字。鴈門曾著幾行書。山中歲月黃虞上。問罷高堂學釣魚。

寄懷左翼宸先生用前韻

古貌古心接太初。先生久與世情疏。霜寒北嶽人無夢。雪滿金城飯有蔬。絕代行藏三徑菊。百年貧病一牀書。吾鄉咫尺高山在。欲見無由託鯉魚。

陪州大夫李侯宣講六諭余作集解付講

萬箇形骸一點同。皇皇鐘鼓啓顛蒙。追陪祇盡逾人職。誥誡渾疑帝載通。臣子事歸忠恕裏。人禽關在聖狂中。與朝化育真無外。共願家庭樂洩融。

庚子穀日州大夫李侯祀壇因陪勸農二首

億萬烝民化育中。遐方血食兩壇崇。爰因八穀祈昌穀。更借仁風洗暴風。前有官焚極壇中者黍稷昭昭中祀禮。煙

雲渺渺百神功。叨陪不是修雩禜。厚地高天鑒我躬。  
頻年水旱不成秋。土瘠民貧舊蔚州。元日共遵王者祀。小康難解大夫憂。窮鄉父老奔壇墮。一輩書生佐  
薦羞。祝罷幾回勞勸語。春光滿地有耕牛。

贈張邃襟儒醫

醫國人難見。君名重里閭。出言皆性命。得力在詩書。白髮知吾母。青山問爾居。韓康來賣藥。儻肯過茅廬。

寄懷江桂菴先生再疊元韻

大地春光素髮同。還從洛下仰高風。百年懷抱渾難盡。五嶽行藏不是窮。梁月溪雲歸夢覺。藥欄盃影助  
神工。懸知訪道程門日。萬派流來只向東。

贈奚紹周儒醫

生來耀骨喜逢醫。況是高堂有老慈。術本天心知動靜。人從我輩託安危。山中採藥煙霞護。肘後懸方神  
鬼知。早晚依君商此道。浮生萬事那堪爲。

時雨會有引

庚子仲夏。募造文廟內先賢先儒一百二十主告成。瞻拜。是日同李侯。任學博。林州幕。李恒嶽。劉因其。  
兩上舍。及廩長諸生。公宴明倫堂。講一貫忠恕之旨。時大雨。因名其宴。

步入宮牆拜聖人。諸賢遺躅始鋪陳。千秋靈爽几筵接。昭代尊崇檜柏新。卿士大夫關道統。文章禮樂本天真。登堂最喜成嘉話。急雨輕雷四座春。

次韻寄毛錦來司理代覓曹辛兩先生遺書

人身多一物。卽多一物累。吾願著書者。由外以返內。近讀文清錄。反覆心如瘁。愧怍惟自知。一室見天地。曹辛兩夫子。遺言求未遂。竿牘詎敢通。咏歌託此意。

家祠成歌詩六章

木有本兮水有源。思大德兮情難諉。構此榱桷兮浩蕩恩。尊有酒兮豆有毛。薦祖考兮几筵高。守茲宗器兮念劬勞。玉有種兮蘭有芽。繩祖武兮報皇家。寧爲麟鳳兮莫爲虺蛇。案有雪兮囊有螢。讀萬卷兮守麟經。好傳清白兮慰先靈。左有井兮右有臼。躬操作兮代慈母。修我禴祀兮糟糠婦。下有戶兮上有坊。物秩秩兮神洋洋。人匪孝友兮降之殃。

唐臣必於帝都立廟。汴宋時亦每於洛京爲之。至於西漢臣子。多以孝壽爲名。不但至尊以爲謚也。自元以來。坊反重於墓。而墓反華於祠。無怪世俗影堂之處。盡作金色化人矣。郝浴附識。

秋日吳椿坪守憲見過留飲

塞上孤城背大河。草堂車馬忽經過。十年京國伊人健。一榻秋心此夜多。襖被風流知魏野。蟄龍詩句憶東坡。吳公蜀人不嫌野老將迎晚。竟日淹留醉碧蘿。

秋日送李侯遷興化太守六首

九宮山色接棠陰。坐挹丹峰處處深。身繫安危天子擢。政留冰玉古人欽。祇求瘠土歸元氣。不令愚民見苦心。難慰蔚蘿諸父老。暮雲春樹有佳音。

報政三年事事寬。登車猶說是偏安。圖書半篋憐清俸。鷄犬千家憶好官。心向士民勞欲盡。酒因攀臥飲能乾。定知閩海登臨日。回念蘿山幾據鞍。

萬里王程不敢留。憐予落落有林邱。綱常道合天應鑒。痛哭書成野亦謀。知己會逢周召伯。聞名蚤達漢諸侯。經文緯武真師帥。漫借臨歧箸一籌。

最是炎荒景物殊。送公南去獨于予。魚鹽戶口今增減。唐宋文人代有無。倭島自來多戰鬪。熙朝此日重訐謏。壺公山上歸來鴈。海宴江清寄畫圖。

閩字宗傳有六祠。朱轡到處禮吾師。攜將庸語充登豆。買得遺書貴鼎彝。海水江濤流自遠。天光雲影趣如斯。儒風比屋興安最。浪說山川產荔枝。

泚泚乾坤幾送行。悠悠壺水復南征。庚桑畏壘風猶在。子產刑書謗易生。壯志每輕天下事。高才多忤世



人情羨君三十知名蚤。華髮仍看晚節成。

寄懷同年翟象陸方伯

握手金臺歲欲深。幾從秦楚問佳音。鐸書一卷銷戎馬。蘭譜千秋慰影衾。籌海正須諸葛算。憐才不數圍

師箴。唐許圍師爲刺史時。每賜屬吏清白箴。令自悔。使君南去風流最。爲託平生一片心。

九日喜胡東甌同年至蔚拜老母

九日風來菊正香。籬邊有客拜萱堂。全因錫類輕千里。漫是懷人共一牀。志挽東流歸布粟。名高北斗奈壺觴。十年素約今方慰。回首驚看鴈幾行。

寄同年魏石生總憲

聖主千秋遇。幾人能報之。大臣行直道。君子頌良時。白簡天應鑒。青編世不疑。好持冰玉節。耿耿寸心知。除日雪。是日隨州大夫習儀候朝賀。

最喜三冬雪。尤難歲暮中。農家占驗蚤。君子笑言通。臘盡寒應洩。春回落卽融。小臣歌帝德。遙拜紫宸宮。哭桑笈雲先生

尙有君知我。君今已不存。交情留縞帶。道味出盤飧。半世操修苦。千秋骨性尊。癯肥何處問。彷彿一招魂。元日毛錦來寄辛復元先生遺書語錄十三種。展讀有賦。

汾河設教又河津。羽翼尼山一派真。千百年來誰繼續。絳州夫子是天民。

遺書論語說。大學說。中庸說。經翼。聖諭解。養心錄。心譜。存。

親編。存烈編。經世石畫。救急單方。衡門芹。神京偶紀也。

布粟從來意味長。三更續火復燒香。守先待後人難見。彷彿當年坐講堂。

宗社安危話不虛。廟堂束帛意何如。可憐扶地撐天手。空付江西薦士書。薦先生者。吉水李公日宣也。

### 家譜成寄謝徐雲門次韻

故家遺範規模在。痛念濠梁水木情。五世幸觀人繼續。百年方信筆縱橫。汾陽墓恥崇輅拜。左氏文慚杜預評。最是歐蘇堪效法。承先啓後賴知名。

### 送李毅可兵憲移任去雲中

報政秦淮後。雲疆又若何。清名懸日月。厚德挽江河。漸起瘡痍色。仍煩痛哭多。他年持節鉞。故老望恩波。

### 喜李晉陽至蔚卽贈

山雲獨臥嬾逢迎。有客西來爽氣清。花下翻書尋古篆。亭前問字識元聲。人疑北海高風在。話到南村野燒明。秋事倍憐徐孺子。憑君詩句報陰晴。徐雲門病。以詩代訊。

### 追弔曹完我先生墓上二首

曠世英雄絕世才。豐碑五尺半塵埋。勳名若與汾陽埒。多少崇韜拜墓來。  
遺金真不若遺經。三尺墳頭草色青。幸有兒孫延世澤。可憐門下獨零星。

春雨值州大夫祀壇

臘雪曾無幾。今春雨乍來。三時成播種。萬彙託滋培。塞土高能潤。王風動欲開。恰逢禋祀日。感召不須猜。  
病中訊稼堂病。次書巢韻二首。

負疴均一月。藥餌復誰輕。灑淚因多夢。關心始問耕。時光看鬢髮。消息律陰晴。詎敢違天意。吾儒道自平。  
欲問襟顏好。書來訊已真。懸知詩是癖。頓覺世如春。百念忘時靜。千秋樂處貧。此身渾太極。一日一回新。  
徐雲門至蔚。有詩懷胡東甌。次韻兼寄。

山城有客騎驢過。上谷先生知未知。百里星文難聚處。幾年風雨共吟時。登龍故迹今人避。傾蓋深心後日期。司馬近來消渴未。南州歸去更遲遲。

步韻題九龍亭亭在鴈門關

大茂峰頭俯翠巒。九龍亭上御風難。東連滄海歸宸極。西絡金城障可汗。飛動欲搖新竹杖。登臨曾掛舊儒冠。  
余壬午秋試。過此稍憩。何當半幅空山影。吹送詩人木榻寒。  
時雲門在蔚。先有詩。

仲夏鄭侯招遊煖泉水亭長歌志謝

城西溫泉如鑑徹。郡侯下車清更絕。五月招我一問之。揮盃照影無炎熱。檻外疏籬互參伍。澆蔬灌山不論主。那得亭榭比江南。只有菽麻成樂土。乘興還訪溪邊邨。老僧稽首啓寺門。入寺雖云依佛座。談鋒析理尊儒言。十年不遊遊不倦。同遊況復多名彥。昨夜雷雨滿青山。今日青山都接面。偶爾委蛇復委蛇。問俗觀風繫所思。君不見昔人跬步留千古。莫負吾儕一日相追隨。

秋日得凌十齋手序竝詩志喜次韻寄答

先生諱雲。號十齋。原號澹臚。粵東仁化人。甲申歲。僑寓蔚羅。與余交。及歸。不通音問者十年。託孫郡丞訪於韶州。得先生詩十

章。繼得五章。謂余寄詩四册俱達。因和韻付明經羅君報之。

嶺外梅花信遠而秋空一鴈寄相思。十年風雨真如夢。兩字寒溫不是私。老贖鬚眉歸本色。心空海嶽啓來茲。家庭無恙爲君報。難報慙慙妙語咨。

秋日劉生振昌自煖泉寄詩惠香葦用韻答謝

蒼圃黃華晚向榮。西莊有帖到淵明。乍驚池上流泉響。如坐山中化日晴。菜把芹莖知故老。詩篇文字賴書生。人依瘠土貧無策。歲歲豐年歲歲耕。

老母七十三誕日紀事辛丑

今年膝下稱觴日。鳳歷初頒紀改元。賴有豐年供賦稅。全無惡夢到晨昏。一家消受平安福。舉念追思浩蕩恩。爲謝親朋多問慰。朝來扶杖出閨門。

冬日聞鄭侯同牛參戎行獵煖泉次倫宣明韻。

絕塞雲荒地接天。水濱行獵響潺湲。鳴弦到處君開網。作賦成時我在田。野樹高梁飛騎度。斜陽古道人傳。定知雞犬無驚夜。安樂窩中記丑年。

十月廿四日得解法周戍粵東消息二首

一戍天南果是真。十年何處問歸人。殘疆未了書生事。薄命空餘太守身。薜荔雲深仍在。枕榔月白與誰親。固知兒女關心少。愁斷飛鴻度海濱。攜得新詩半卷無。此行不復有危途。家貧宦拙天應鑒。法密恩深汝自愚。梅嶺月橫何日度。珠崖潮退一人孤。而今欲寄平安信。卻恐書中涕淚俱。

有夢十一月十一日

有夢夢何來。覺後夢難寫。我思古大臣。盡是小心者。姬公誓金縢。吐哺興周社。霍光輔幼沖。不失尺寸也。日磾忠孝人。牽馬過殿下。君子慎所守。道全而過寡。

和韻答成我存

負米歸來八百日。燕山北望隔重重。那能素友詮吾道。幸有荒田副老農。入夢祇尋無夢國。登高不上最高峰。何年攜爾鵝湖內。洗盡吾曹芥蒂胸。

山水歌爲林太翁暨太母雙壽閩人僑寓金城

山之峙以實。水之鑑以虛。我觀物理固若此。人爲萬物之靈當何如。莆田先生清白裔。少負偉略薄曲藝。三十年來讀道書。何年通徹天人際。天人之際知者希。滿眼富貴雲飛飛。莫向前古問消息。近代儒家有布衣。要識萬物爲一體。昔年救荒補周禮。當其萬口待甦時。呼吸人我真根柢。賢哉舉案匹梁鴻。濟人利物心相同。一米一蔬敦儉樸。自操井臼垂家風。今歲花甲週已過。霜清月白不言餓。左瞰大茂右桑乾。木公金母同龕坐。誰云馬氏有五常。森森玉立好兒郎。父子兄弟互酬和。太和元氣滿高堂。或爲負米供菽水。或爲萬里北望舉霞觴。爾時共羨融融而洩洩。惟有使君對我情惶惶。拜手前致詞曰某也不可以爲子。毛生捧檄良有以。那知五斗累雙親。嗟乎不可以爲子。魏子聽言忽默然。轉思榮辱得失事由天。父母有兒心不愜。功名無分道終全。俯仰天地之大吾何有。智者樂兮仁者壽。鄉國有善俱可爲。于門高大元不偶。篋裏富千篇。塞上得一友。左先生也。蚤晚驅車返故園。願採長歌記辛丑。

歲暮雲門見懷次韻答之

山中無歷也知年。讀罷新詩轉自憐。芸蠹濫分藜火照。墨鴉親付乳兒傳。驚心紫塞春猶黯。著眼蒼松老復芊。幾向高堂思范式。苔痕雪徑尙依然。

送劉毅公司教浮山

雖爾爲師範。猶然是妙年。要知求大道。不肯讓高賢。王屋千峰接。河汾萬派連。文中芳蹟在。拜訪問真傳。

送林二史歸應州時攜家集過訪

斯人纔一見。相對忽情深。父老知官況。文章寓道心。愛親須貴我。好古豈違今。雪滿恆山路。臨風寄好音。

次雲門思歸韻因送之

重踐輿亭約。君名已泰山。逾看丰骨老。不見鬢毛斑。直筆通家望。歸心靜者閒。固知惜此別。何日去仍還。

白懋韓中丞撫晉六年未通一刺茲奉督秦之命於其去也西望而歌之

惟古大臣。不嚴而肅。六載河汾。享無事福。嗟此殘疆。雲中爲最。公來撫之。鄭圖屢繪。旌我門閭。題以山斗。況曰人倫。對此心忤。節鉞旣西。西望下拜。豈無贈言。功令是戒。

恭輓世祖章皇帝升遐四首集杜

萬象皆春氣。危樓望北辰。鼎湖龍去遠。象闕憲章新。今日看天意。中原仗老臣。向來憂國淚。懷舊益霑巾。萬歲蓬萊日。艱危褫職陪。一朝自罪己。白首獨餘哀。松柏瞻虛殿。文章落上臺。不才甘朽質。莫使棟梁摧。鳳歷軒轅紀。王春度玉墀。賦詩拾翠殿。教練羽林兒。自罷千秋節。到今耆舊悲。君王自神武。不愧史臣辭。

天屬遵堯典。乾坤繞漢宮。忽聞哀慟詔。已作白頭翁。勳業青冥上。園陵白露中。眼前今古意。忍對百花叢。

辛丑春懷八首集杜

北闕更新主。東方領縉紳。聖情常有眷。雄略動如神。黃閣長司諫。蒼生倚大臣。爲於耆舊內。台衮更誰親。  
煌煌太宗業。天子惟孝孫。宮禁經綸密。山河功業存。向來論社稷。新渥照乾坤。王國稱多士。心肝奉至尊。  
宗枝神堯後。逝水自朝宗。霖雨思賢佐。山河誓始終。中原戎馬盛。萬里車書通。不必伊周地。蹉跎效小忠。  
神器資強幹。雷霆可振威。奸臣競菹醢。耆舊把天衣。哀痛絲綸切。謳歌歷數歸。指揮存顧託。端拱自光輝。  
碧草違春意。憑高涕泗流。聖朝新孝理。天子嚮時憂。感激張天步。從容仰廟謀。蚩尤終戮辱。高枕對江樓。  
扈聖登黃閣。蕭曹拱御筵。恐乖均賦斂。無取愧高賢。盤錯神明懼。黎元疾苦駢。長懷報明主。何以報皇天。  
分手開元末。長懷禁掖垣。避人焚諫草。直氣橫乾坤。但使芝蘭秀。甯無燕雀喧。致君時已晚。伏枕淚雙痕。  
通籍踰青瑣。先朝忝從臣。此生遭聖代。錫號戴慈親。素業今已矣。乘時各有人。仰思調玉燭。一氣轉鴻鈞。

正月七日恭遇世廟忌集杜壬寅

元日到人日。看雲哭九疑。卽今蓬鬢改。空有鹿門期。北闕心長戀。人情老易悲。去年梅柳意。野老復何知。

正月七日恭遇世廟忌集杜癸卯

層城臨媚景。已度立春時。朝野歡娛後。風雲際會期。尉佗雖北拜。貞觀是元龜。處處逢正月。哀歌欲和誰。



正月七日恭遇世廟忌集杜甲辰

高樓思殺人。回首一傷神。只益丹心苦。應宜綵服新。浮生看物變。久坐惜芳辰。縹緲蒼梧帝。宮鶯罷轉春。  
壬寅元日。隨州大夫朝賀。是年改元。入覲時。聞停徵練餉之諭。恭紀二首。

望闕思天表。呼嵩際大元。來同方述職。輯瑞正臨軒。蚤已通民瘼。何須叩帝關。微臣依子舍。先布聖朝恩。  
布德當春令。因風覓好音。驚聞天上語。始見日邊心。萬國輸將正。中朝軫恤深。太平原有象。不向物華尋。

送聶天一同年補秦閩參軍

唐風樸陋賦堯都。又賦秦風寫壯圖。馬首共瞻西嶽色。幕僚誰臥白雲孤。文章兩漢先京兆。形勢千年幾  
大儒。珍重遺編須購取。佗看雙雁度飛狐。時託購呂涇野馮少墟二先生語錄。

靈邱宋紫庭明府遷粵東牧投詩見別因和元韻四首送之

山城叢爾藉名儒。爲政風流擅八區。父老相傳今是母。兒童漫唱昔無襦。澹河月冷諸川會。太白雲生萬  
嶺迂。爲愛頻年桑柘影。願瞻餘蔭一攀趨。

才華弈弈接西京。彷彿絃歌政已成。塞土荒亡曾入告。前朝曠害倍關情。訟庭閒寂看雲過。書帶幽潛傍  
雪生。萬戶柳煙潘岳蹟。鷺鷗從此結新盟。

塞垣風雅共君開。幾度詩筒過嶺來。小史漫追司馬筆。大文誰讓子雲才。放衙山色驚窺案。行部仙姿憶

舉盃蚤晚輜車徵下國。一編曾續劫餘灰。新纂邑誌。

蹟遠滄洲又幾年。征車此日去塘川。人遊榆塞官皆隱。地到羅浮吏亦仙。先輩文章空學海。余訪輯白沙、剛

四先生遺書。故人風雨半歸田。訊渡十齋隱仁化。許鷗涓歸瓊山消息。嶺南儻有梅花信。一度詩來報一篇。

### 自責二首

半生屋漏有根基。況是聞言警戒時。風俗人心誰可救。指天誓日欲何爲。平日休誇器量寬。一當誹語怒冲冠。工夫涵養從今驗。行路方知行路難。

### 郝贊皇折贈緋桃。余折李花贈答二首。

李花纔放玉無塵。日日亭前奉老親。折得緋桃重寄我。案頭別見一枝春。投桃報李古人詩。咫尺芳馨對面時。不比江南梅信遠。膽瓶紅白自相宜。

### 次韻贈高二亮過蔚將遊河汾

間氣領燕趙。中夜生夷憚。草堂辱過從。慷慨見胸膈。載讀黃雜書。一字有一益。大巫神力王。蔑鄙深自責。半生耽著述。所學類癡癖。下之遜關閩。而上謝旦奭。蠹魚空啣晤。嗟哉老縫掖。雙鬢久騷然。欲語淚盪溢。惟茲堂上人。菽水慰朝夕。眷懷雲龍交。阿誰同莫逆。自君度關門。拜君如拜石。高臥豹林秋。疑補謫仙籍。溯我壺流清。把我屏山碧。把臂輿亭旁。爲言敦麗澤。遶屋翦春蔬。傾盤虛隴腊。在德甯在酒。相對心已獲。

竊聞俎豆家。咨詢重安祐。啓祠肅而入。宗法藉細繹。古來天下才。不失寸與尺。千仞徒崔嵬。瑞鳳鍛羽翮。清時詔屢下。漢庭需儒碩。石渠天祿間。珥毫視簡冊。瑚連豈下陳。京華望連璧。詎知一再除。似果不離核。五斗賦歸來。但守晏嬰宅。念予事躬耕。操器荷日炙。愧乏仁人言。貽贈訪姑射。

午日牛參戎招同鄭侯泛舟河中二首

壺流如帶也冲灑。午日仙舟罨畫中。鷗鷺幾羣消戰壘。鼓吹一部兆年豐。新荷出水青猶薄。弱柳沿堤綠正叢。指點煙波吾欲老。黑龍灣下釣魚翁。

黃童白叟漫相攜。爲看樓船到碧溪。王濬談兵登畫舫。蘇公爲政築長堤。閒花接岸開如錦。翠荇成茵望欲迷。客興正多風浪息。此中原未有鯨鯢。

端陽次日鄭侯招同牛參戎夜泛。是日有平滇詔至。

已荷相將汗漫遊。重來卜夜問虛舟。笙簫逼水清如話。魚鳥窺燈去復留。雨腳半從新月轉。霞光尙帶夕陽浮。此行不是山陰棹。遠寺鐘聲聽已悠。驚聞漢詔下邊城。恰在中流說太平。父老忻傳輸輓罷。干戈直向夢魂清。帆收壩口旣仍舉。雲亂波心水獨明。幸際興朝泉石穩。使君從許訂詩盟。

哭林華東州尉四首名養心。順天大興人。

佐政三年外。良知一念存。甘教名譽失。不願室家溫。化俗尊天理。逢予問聖言。自來多醉尉。誰似秣陵魂。久欲辭官去。還因半職牽。病顏非昔日。愁鬢自今年。有藥歸巫瓦。無棺賴俸錢。安危君已料。空繫蔚人憐。遺榭空庭裏。孤燈閃幼兒。悲來應有恨。哭罷總無詞。幾日歸邱壟。何人誌口碑。邊雲連夜黑。造化必深知。留得清名在。官卑益可欽。操持吾輩事。悃悃古人心。豈獨賓京兆。還堪配汝陰。妻孥甘凍餓。不願受冥金。

王羣玉明府投詩見訪。次韻留飲。

咫尺懷仙令。逢君色笑開。居然人似玉。豈止政如雷。夢向吳江遠。車從北嶽迴。山家留客意。不速肯重來。

秋旱喜雨歌

三伏已過炎暑徂。秋雨如玉復如珠。五日不雨仰天呼。十日不雨對苗吁。吁嗟吁嗟吾苗乎。苗而不實有以夫。待爾一半了新租。待爾一半償舊逋。待爾一半補妻襦。待爾一半充兒餬。高堂菽水僅盂盂。忍令垂首食糗糒。望雨望雨心如痛。願從悔艾求中孚。昨夜小雨飛淒淒。今朝四野慶霑濡。天心仁愛不可誣。彼舞雩者愚復愚。

老母七十四誕日紀事壬寅

白髮蕭蕭暗裏窺。今年多似去年時。傷心已往休回首。又到吾親兩鬢絲。美酒芳筵謝六親。家常菽水漫傷神。年來膝下雙孫繞。今日相看少一人。

深閨獨坐自心清。兒女難將愛日情。願得高堂無淚下。不須儀物祝長生。  
敢云簫鼓動歡顏。說到稱觴淚已潸。野服山蔬率兒子。不教身掛舞衣斑。

成我存告歸。寄所著悅心錄爲別。讀而贈之。

報我歸山去。潛心得妙編。自遠程子座。誰著祖生鞭。吾道真南矣。爾官合澹然。半生貧病足。不是愛耕田。  
滇事平。海逆復。率衆歸順。各賦一章誌喜。

露布新傳拜尉佗。先皇廟略竟如何。王臣萬里專征密。甸服諸家效力多。已報公孫能就絡。蚤知餘孽必投戈。遐方自古尊聲教。誰道單祠馬伏波。

頻年海上失遊魂。宵旰殷憂廬至尊。輸輓東南諸路合。樓船日夜萬兵屯。功成幄裏彰天討。款納軍前示國恩。半壁風濤從此息。佇看明詔問元元。

次韻酬連克昌進士兼訊楊猶龍在蜀消息。

煙霞渺渺護萊衣。笑倚空山且闔扉。燕趙近傳名進士。中原一變舊詩歸。蕭王陌上秋風迴。諸葛祠前客夢違。一卷孝經堪自慰。瑯玕漫引雪霏微。

地封至蔚恭紀

承恩幾載侍庭闈。又捧丹書下帝畿。鳳口銜來紅日近。龍章開處紫雲飛。絲綸顯赫驚閭里。翟茀輝煌映

綵衣慚愧小臣難報答。每瞻北斗更依依。

次韻送馮訥生內擢國學

大道昭千古。尼山本儒躬。馮子有素志。浩然如雲中。雲中競華縟。寓書悲畫龍。比聞博士召。奮發資羣英。六館不寂寞。永夜藜光青。伊川胡力辭。所學在彝倫。嗟予寡陋者。四座疇爲春。

祝老友徐雲門七十初度用前韻有引

余生日例不敢受祝。亦不敢徇俗爲人祝。曩在都門乞壽詩者。泛焉酬之而已。竊思孔子之學。十年一新。所謂自強不息。法天之健也。世人生日年一遇。不過歲月之常。其可祝者。道德文章。因年而進耳。若以絕未有之事。粉飾鋪張。不顧人之所安。直笑罵矣。祝云乎哉。余與雲門交有年。素相信。各不沿俗。今年雲門七十矣。文氣日以宏。詩律日以細。所著郡邑乘及家乘之類。卓乎於人倫風教有關。回憶六十年。以至於今。又是一境。過此以往。由博返約。未可量也。此雲門異乎昔年之生日。更異乎他人七十之生日。余可以祝。雲門可以受矣。

有豹居南山。霧雨澤其躬。我讀高士傳。多處菰蘆中。塞上有徐子。詞華擅雕龍。墳典性所好。炳燭氣英英。自昔養阿母。遙謝綬花青。古道照肝膽。麋鹿時與倫。酒熟一長嘯。遐哉羲皇春。

孔君方別駕惠闕里誌檜圖志謝有引

樞山居養母。分不敢一刺當事。聞孔公聖裔也。官茲土。嚮往久之。老友雲門稱述不置口。閱年餘。惠闕里誌。檜圖至。捧詣先師主前再拜受。以聖人家法在焉。樞年四十有七。未嘗一至魯邦。瞻廟貌。戊戌歲。都門與友人講孟子盡心知性章。是夜夢青衣儒。繼高巾者二人。導入廟。立殿門闕內。令跪拜兼古今儀。蒙先師賜飯一盃。謝畢。二人導謁四賢祠。顏子曾子同龕並坐。子思子降一龕獨坐。孟子別龕側坐。呼樞名語至再。二人復導之出。覺遂記之。歸里。如前夢祀於授經堂。朝夕對越。今視誌圖。規模宛然。惟四賢坐次差異耳。殆所謂羹牆寤寐者非耶。嗚乎。先師不夢見周公。自歎其衰。樞夢見先師暨諸賢。幸而未衰。究恐虛生浪死。爲孔門罪人。得無夢竊乎。率成一律。以報聖裔云。

尼山家法杳難追。萬古綱常是我師。血脈天歸孔子系。羹牆夢繞大成祠。渾疑簡冊非無故。一溯淵源已在茲。珍重瑤函羞欲死。平生那敢告君知。

寄懷李吉津先生

紫塞風高鴈影寒。先生何日返朝端。懷沙未許孤臣賦。鵬鳥曾聞素友嘆。昭華龍喪。天中俱亡。北望金臺多駿骨。東臨滄海一漁竿。先皇舊德終難報。遼左於今說幼安。

老母七十五誕日紀事四首癸卯

昨歲悲傷劇。今年步履艱。緩行庭院裏。須駕板輿還。板輿如小椅。下有四輪。兒孫推挽而行。

菜粥方辰。啜。以菜和粥也。臙羹。下午餐。羹湯切。麵也。兩盃難運化。尙藉保和丸。

崩中醫者諱。結燥。老人常滋潤兼清補。經年無驗方。進觴鄉俗好。貧富豈能齊。爲謝親鄰意。休將酒榼攜。

刁蒙吉先生索詩壽熊母兼寄熊恕叟祁州

維昔言游氏。武城得子羽。吏道與士風。芳軌邁千古。祁侯楚名家。吳地相接武。下車問民情。異政紛難數。頑懦可以興。伊誰奉規矩。式茲卓行人。居是邦之主。造膝潛室中。顏曾世復覩。肅然事如兄。退食資進取。歸而告萱闈。吾將治鄒魯。母曰其敬哉。慎勿愧三釜。孝子壽其親。在德不在組。恭逢設帨辰。觴罷綵衣舞。仰觀慈母心。欣然聞召杜。舉觴以賜侯。仕矣仁有輔。所願男子弧。揮作蒼生雨。父老歌堂階。高賢入城府。太和家庭間。盛哉循良譜。

夢雲門訥生

仲冬有五日。中夜夢徐子。就余問五行。果否真宗旨。余曰大哉問。數也而兼理。五德生所俱。曷不求乎邇。馮子適在旁。正襟肅而起。曰惟素心者。印證乃如此。先生善誘人。願俾聽者喜。覺來歎神交。砥礪愧糝滓。誰云寤寐間。所學能已已。

輓同年楊猶龍方伯用贈余歸省元韻



白雲深處是吾廬。有詁驚聞六月初。左轄官留西蜀恨。右軍名重上林書。公先奉世祖命書浣花有句瞻鴻鴈。鉅鹿無書託鯉魚。哭罷故人無一語。自窺雙鬢已疏疏。

輓李退菴少司寇用贈余歸養元韻

請急南旋事不聞。傳來凶問忽紛紛。故園孤陋空餘我。南國風流境失君。十載肝腸留翰墨。一天風雨罷耕耘。可亭竹樹依然在。哭斷江東日暮雲。

輓同年楊賢甫少司馬用贈余歸養元韻

攜得高吟去國門。思君常傍九重闈。濟人古道追前輩。醒世名言布聖恩。身後始知司馬重。朝班不見侍郎尊。素車白馬何時弔。淚灑畿南日已昏。

輓曹厚菴學士四首

居業書成志不移。一生功課影衾知。只今御座談經處。道學應垂聖主思。道誼深深接面疏。省中春樹果何如。當年侍從無休暇。今日空留翰墨書。譚子遺孤託死生。歸家正好報嚶鳴。可憐客舍仍相託。魂去悠悠漢水清。一從東魯問真詮。萬古天倫在兩肩。常德黃州身去後。不知誰氏衍薪傳。

輓同年晉長眉銀臺

庚甲相同譜亦同。兩心常對月明中。報君一札無人拆。西望雲山弔北鴻。

春日送太守蔡公介磁陞任去雲中

雲中古戰場。循吏以佛稱。雖現宰官身。不談最上乘。惟有蒲作鞭。兼之心飲冰。殘黎有幾箇。雖鳥糞飛騰。忍令父若子。避家如避憎。聖主子吾民。臣敢博廉能。夙夜前請命。廢食涕沾膺。十一州邑間。長照光明燈。稱佛雖怪誕。愚口曷足懲。昔日余九江。祝頌多異徵。卮言當左券。庸敢比百朋。

壽胡年母七十兼寄東甌

十載交胡子。胡子有老親。鴻鴈度桑乾。動定相咨詢。稔知宦未成。兵燹留孤身。歸來慈顏好。那復知艱辛。書巢貯千卷。几榻生綠塵。著述甯在多。溫故而知新。堂上時垂聽。婆娑移天真。今年夏四月。爲介七袞辰。繞膝長蘭芽。入座無雜賓。三公不可易。一日足清貧。古人以道養。大節何嶙峋。胡子登我堂。余慚拜母人。舉觴誦里語。太和一家春。

次韻贈苗淩漢先生自河曲見訪搢所著明經錄

大道久榛棘。餘姚倡良知。良知何由致。求仁平旦時。傳說日紛亂。格物謂支離。我讀明經錄。豁然釋前疑。考亭貴窮理。古今甯外茲。願言敦踐履。方寸有餘師。

輓韓聖秋兵曹

強半交遊付太虛。論心秋舫憶君初。原因道學稱朋友。故枉詩篇問起居。一代幾人言未絕。百年何事夢全疏。臨歧佩取歸宗意。贈我橫渠一卷書。

老母七十六誕日紀事二首甲辰

一齒今年乍落。雙眸入夜猶清。藥嫌參朮歸芍。食喜椒薑菜羹。康熙三年六月二十  
五日。初落一齒。

舊恙全然脫體。癡兒幸免迴腸。不爭膝下三祝。且錄囊中一方。方名香枳湯。藥三味。枳殼防風甘草也。載壽親  
養老新書。服一劑諸症悉痊。先是求南北醫者方  
俱不效。老母憚於藥。命勿進。凡兩月餘。忽祕結  
七日。象樞檢方得此。遂投之。時十月二十七日也。

寄同年魏貞菴先生

墀頭曳履氣沖融。四海英賢夾帶中。啓事舊推山吏部。黃麻新拜漢三公。百年兢業關臣誼。一體中和佐聖躬。爲報高堂能健飯。草勞書札更相通。

宋烈女未嫁殉夫作此紀之二首

磨笄山下結靈奇。閨閣千年有素姿。僻壤幾曾嫺內則。天良原未著人爲。心堅媒妁牽絲日。命絕郎君折玉時。聞道總帷風瑟瑟。不教人哭有情兒。女名典姐。蔚州衛西崖頭人。督學使  
蕭公探風上聞。如所請建坊旌表云。

連朝風雨黯孤村。彷彿乘鸞月下魂。井臼未操應有憾。絲蘿一斷更無言。千章梓木棲雙鳥。三尺桐棺泣獨猿。不數悲歌燕趙士。史官別是一評論。

送王允升廣文歸陽城

兼葭白露此清秋。聲氣欣從物外求。人是老儒應好問。學因野獲更多謀。微官有分平平作。大道無私漸漸由。歸去寄言諸素友。恆山西望路悠悠。

老母七十七誕日紀事乙巳

歲序乙巳冬。孟月之六日。恭逢設帨辰。慈壽七十七。齒進德彌邵。素心惟樸質。三澣衣未除。重念絲成匹。舉步良云艱。坐臥常不出。牀頭一指揮。家人懷師帥。寢興必以時。平生恥自逸。族黨兢紛華。聞之若有失。屆期請開筵。母曰願真率。慈命那敢違。菽水繞雙膝。

張慧一貳尹以運餉歿江甯。櫬歸陽武。內君袁氏哭絕食。夜縊官署死之。各賦二詩紀事。

大江南望水流澌。輸餉微臣畢命時。萬里間關魂不定。祇依難弟與孤兒。一郡爭傳孝友聲。渾金璞玉是平生。於今夫婦捐軀日。始信家人卦已明。慧一治易  
不同藁葬不迴車。大節先留博浪沙。怪道蔚蘿閨闈女。人人灑淚說張家。  
春來乍見從夫女。臘月驚聞女丈夫。靈氣百年今日合。城邊老樹泣雙烏。

蔚州鄭侯惠朝衣一襲志謝有引

朝衣著廿年矣。予告家居。朝賀禮罔敢廢。州大夫鄭侯數見之。謂緋非國制。又短窄弗稱。而且敝焉。遂

解新制贈余。既拜受。因憶甲午春分。以吏垣長陪祀朝日壇。侍班候駕過。世祖章皇帝左顧呼名大笑。聞之者曰。笑魏給事緋衣也。今易此以章州大夫之惠。然不能無感於疇昔云。時乙巳十二月廿八日也。

廿年前製一朝衣。伴得君恩下紫微。拜舞敢忘呼聖壽。歲時儘可慰春暉。每思朝日趨陪罷。曾荷先皇賜笑歸。郡伯解來真國體。不因輕換舊牙緋。

元宵侍母看鄭侯見貽火花二首

策杖庭階步已難。上元時節怯輕寒。郡侯曲體承歡意。火樹溫然贈母看。千枝萬葉結明燈。比歲元宵見未曾。不是太平真樂事。慈輿那肯到松棚。

懷仁縣于生懷漢出家穀千石賑濟饑民曹秋岳兵憲賦詩美之屬余同作

懷仁黑子邑。殘疲綴雲邊。雲邊盡瘠土。沙石滿平田。畝收三斗粟。擊鼓慶豐年。彼蒼安可必。旱潦何連綿。糠粃值珠玉。萬竈絕炊煙。穉兒哭無力。老翁踣呼天。頻年逋國賦。生聚已蕭然。老穉一死足。門戶儻苟延。苦勸壯丁出。就食蚤言旋。那知出不返。白骨棄荒阡。雲中有鄭俠。繪圖天子前。遣使賑諸郡。田租賜全蠲。忍餓待恩澤。義士增涕漣。念某蓄千石。躬耕聊自全。會看閭黨盡。一家擁橐籥。官長廢寢食。願以濟羣癩。憶昔甲午歲。凶歉獨蔚川。有民好義者。按里名煖泉。捐賑閱兩月。全活累數千。種德那敢道。萬口空留傳。

嗟今俗漸薄。避義如避淵。問彼士若民。誰爲著先鞭。我讀紀義詠。表率賴高賢。少陵稱詩史。於茲復見焉。同室慚閉戶。流汗續新篇。

美直隸督學使者蕭公二首

名惟豫。山東德州人。翰林侍講。

侍從持衡迥不同。邊隅彷彿認青驄。懸知畿輔人文地。委巷兒童說至公。

一柱中流勢欲孤。冰心耿耿是吾儒。自來學術淵源繫。始信歐陽得大蘇。蕭爲同年王近徵山左所得士。

送徐子遜學憲試竣

借才農部體雍容。晉國衡文帝簡中。絳帳晴開句注北。青藜夜照五原東。八章約法尊天理。一點虛心起士風。砥柱狂瀾吾輩事。願同畿輔頌蕭公。

再讀蔡汝濱先生集敬賦

曠代思君子。百年見此人。淵源從粵海。嫡派屬汝濱。行業吾儒貴。圖書後裔真。焚香還靜讀。今日愧天民。

夏五月芥園侍母看花二首

藥欄簇簇鳥關關。手挽慈輿綠樹間。最愛亭前香不了一迴風過一開顏。花陰密密草芊芊。移得牀來樹底眠。撲蝶兒童驚夢覺。始知紅日到西邊。

七月二十三日夢張伯珩同年卒於官

一友天何吝。中宵欲問之。斯人猶不幸。吾道竟難知。盡墮鄉邦淚。空勞夢寐期。自傷年五十。孤立鬢絲絲。  
張公兩淮三秦皆有遺愛。左遷尤非公議。先生固爲世道惜也。王士正識。

八月十七日伯珩中丞訃至蔚州對使哭之並輓王允升廣文。

已到傷心處。何堪又哭君。十年雙涕淚。一縣兩高墳。練帛招開府。寒漿酌廣文。舊時聞道語。遺藁未曾焚。  
允升著有夢易解。

老母七十八誕日紀事丙午

翠屏崔巍壺流清。一菽一水此中生。時和歲稔天地德。民安盜息山川榮。官長爲政持大體。千村雞犬何曾驚。晨昏碌碌侍慈母。慈手加額頌昇平。上託天子下祖考。七十八度春秋更。白頭滿眼辛無恙。膝下謾言舉兕觥。稽首北闕致拜跪。倚杖東祠看黍盛。年復一年敢忘報。食息視聽真生成。拜罷始受兒女祝。起居不文惟至情。一家黽勉事耕讀。共體百年葵藿傾。諸孫穉幼兒老大。祇愧難貽堂上名。

李天葩內姪因讀禮謁余共談家禮

萬事浮雲總不真。忍將格套奉天親。蔚蘿亦是敦倫地。幾見麻衣讀禮人。

並蒂果獻母歌詩紀異

異果何曾見。吾家歲歲生。並花仍並蒂。連顆復連莖。葉似姜公被。根疑田氏荆。至人齊萬物。草木豈無情。

送蔚州鄭侯內擢刑曹兼詢舊時諸老五首

六年出守在邊陲。一望行旌繫所思。宦蹟每從功令見。苦心安問士民知。月明雞犬村無擾。雲臥桑田版不移。俗返陶唐還有意。他年好記舊遊時。

講學堂成道未成。慚予涼德負深情。高談不減鴻儒望。大雅真超俗吏名。佇看修齊爲事業。願言忠恕是躬行。卽今聖主明刑切。力佐皋陶廣好生。

升堂拜母誼何如。爲別萱闈問起居。敢謂子民堪敬式。重勞司寇及門閭。官銜自惜無竿牘。都下從今絕鴈書。儻念一家依樂土。不衫不履任迂疏。

全將道誼與仙曹。大器從今日日韜。晏子衣裘當世諱。于公門第古人高。胸無一我才方著。志必千秋氣更豪。六載交情真似水。贈君猶自愧綈袍。

自從乞得綵衣還。身在庭闈近十年。咫尺京華疏翰墨。低徊時節憶班聯。迂人祇合耕耘老。腐氣深愁話語顛。天上故人如問訊。山中菽水正悠然。

保定劉敷季至蔚以講學文二章來見卽贈

大雅猶能見。翛然一布衣。乍逢如有舊。相對已忘機。抱璞驚雙壁。觀星接少微。庸齋留片席。別去寸心違。

富平李天生至蔚以長歌來見卽贈



讀盡書千卷。知君有夙根。平心按理窟。老氣逼詞源。既見真如醉。何時進一言。歸家須努力。經史待評論。  
寄懷趙錦帆同年遊鴈門

句注山前草色新。故人騎馬渡河濱。中原才子知誰健。上國仙曹向我親。風雨半催詞賦老。弟兄猶賸髮  
毛真。少陵出塞詩無敵。莫諱東西南北人。

張爾成自中州郵寄詩集。卽用集中韻奉答。

可享風雨夢相尋。喜見春鴻接塞吟。入部山川多異蹟。中原名碩半知心。碑銘朗誦文皆籀。卷帙重封字  
有蟬。爲報蔚蘿衣綵後。幾回東望五雲深。

再哭張伯珩。憶己亥同田沛蒼太史。餞余北郊。

祖席分雙袂。間關逾十年。居然言笑隔。忽爾死生傳。道誼中丞淚。文章太史筵。鄉人思舊德。應薦社雲邊。  
應州傅侯攝蔚篆事竣。走筆補看花之約。十首。

美人爲政坐官衙。四月邊城始見花。讀罷道書無箇事。相將一過野人家。  
杏花開罷李花香。四面芳菲接短牆。近日板輿仍未出。特邀五馬踏春光。  
霏霏小雨溼新苔。攜得奚囊入座來。無句不留風雅在。稔知仙吏是仙才。  
暮春歸去尙尋春。一派天機我輩人。遲早尋來春不遠。莫教空負百年身。

草色花香共鳥啼。醉翁無酒醉如泥。誰將可對軒中話。敢作風雲月露題。  
琴音彈罷自和平。況復殷雷耳畔轟。座上莫嫌賓客少。廣文還有一先生。  
談文講學通家子。揖讓從容事可觀。他年若露真頭角。始信尼山道路寬。  
同春亭上樂何如。四野桑麻一卷書。爲報士人春信好。清風明月照吾廬。  
蔚城元氣凋殘久。滿眼春光天地心。不信但看亭畔草。生生化化到於今。  
神交十載欲忘言。忽有車音到芥園。九十日來瓜李跡。一時磨去總無痕。

中秋前三日。程西離學博。招集明倫堂論文。令子仲甯暨長孫同小兒侍座。

幾年投契廣文氈。每對先生意藹然。素性從知心似水。大文真羨筆如椽。高談月下無詞賦。淺酌盃中有  
聖賢。更喜兒孫頭角露。一時相見果翩翩。

祝李恆嶽妻兄六十初度

大茂何崔巍。佳氣結蔚谷。中有餐霞人。隱居課耕讀。孝友性所成。舉火暨三族。惠及里黨間。任卹不勝錄。  
義在則勇爲。遑擁吾家蓄。以茲好禮心。潤身兼潤屋。與人若春風。對之溫可掬。兒孫兩三世。謙讓貽之福。  
舞綵繞膝前。菊開酒先熟。康哉杖於鄉。大年從此卜。

老母七十九誕日紀事丁未

比歲無他恙。遠和獨此年。嚼冰如美食。啖果代烹鮮。四體浮難動。中央滿更堅。疑為虛己誤。認作水猶偏。胃痛腸多祕。腰疼血屢便。直攻猶未合。峻補豈宜然。診脈知洪數。察形識變遷。不妨行積滯。兼以用開宣。嘗藥心靡定。知醫道未全。分消丸始製。敗毒散初煎。利下真盈百。艱辛那計千。春來秋計杪。食入寢安眠。十月逢初度。一家省夙愆。親朋惟道福。子女盡呼天。此症何曾見。吾慈意得痊。駐顏休問酒。謝客不開筵。夜夜圍燈下。朝朝坐膝前。從知勤儉德。況賴祖宗賢。變淚成歡笑。存方記後先。五旬兒有幸。百歲壽無邊。翹首興亭月。重虧復大圓。三月二十日晨起。腰忽痛。閏四月初九日。痛纔止。坐堂中。時復感寒。渾身冷顫。微汗飲不效。六月十五日起。服分消丸半料。一月之內。瀉百次。日喫西瓜一枚。食始進。八月二十六日起。服金匱丸半料。之半。九月十六日。服消風敗毒散一劑。身腫漸消。九月二十四日起。服神芎丸半料。腫消過半。又服半料全消。至十月初六日。神氣已復。生平勤苦事。悉記憶不忘。尙未能下牀舉步。是日概辭親友勿拜賀。兒孫輩代母叩家祠。不令稱觴。惟坐臥自適而已。

語云。弓矢始於古之孝子。益知素問難經。為後世之仁人衛護其親而作也。歧伯謂帝曰。目明心開。而志先慧然獨悟。曰神。細玩引與什。純以神行。殆所謂執玉捧盈。視於無形。聽於無聲者耶。合參祥之思慮。會桐俞之聰明。自季春念日暨孟冬初旬。幾與造化爭能。仰留一息於慈闈。即是密復一元於大塊。聖若賢參高配厚之業。莫不自此中流出。天下文章。百代風雅。有大於此者乎。遐流孤露。抱恨終天之人。讀之一字一血。思先生京尹時一疏。過量之憂。反覺不孝。忤罪如山矣。燈下低徊。慚悚萬端。骨折心驚。有如此夜。郝浴拜識。

題小品圖為老母病牀展玩

坐臥牀頭一步難。權將景物解心寬。世人多少傳家寶。幾向慈親手內看。

坊成老母有訓

進士坊成祖宅門板輿相過誠兒孫身榮莫作誇鄉里字字標題紀聖恩。

戊申元日隨州大夫朝賀恭紀新政頌而祝之。

七載朝天闕乾綱獨攬時大恩推撫字。

特定夏稅五六月秋糧九月十月開徵仍嚴究私派

名諫黜華靡。

禁士大夫奢侈及蓄養優伶

吏簡封疆重。

保舉才望

賢能堪任督撫者不限資俸

權行賞罰宜。

議復舉劾並行之例

抄來新報紙勒作太平詩。

讀沁州郭靖寰先生傳敬賦二十韻告三立祠。

汾流接大荒地氣匯山右。河津安絳間道學稱淵藪。沁水分二支。土俗歸醇厚。州序有舊祠。昉自三不朽。惟人不惟官。俎豆良非偶。明經郭先生。從祀日已久。我讀外史傳。肅然爲俯首。世間節婦多。義夫幾曾有。結髮嬰惡疾。中年擲箕帚。兒女三四人。依父以爲母。糟糠不下堂。二豎何足醜。晨夕勸加餐。寒暑浣衣垢。撫恤三十年。敬之如賓友。或云置小星。先生謝否否。艱苦吾備嘗。士行終不苟。高風播於鄉。膾炙千萬口。歲時採蘋蘩。父老酌春酒。孝哉廣靈君。隕涕感下走。余也愧腐儒。安得獻一卣。所願操蕪詞。告曰蔚州某。

老母八十誕日紀事戊申

君恩特許侍萱堂。八十春秋始進觴。菽水敢言酌聖善。絲綸蚤得荷先皇。姻親里黨持華祝。碩輔名卿賜錦章。鶴鹿疑隨萊綵舞。兒孫樂擁板車忙。一登一拜慈顏喜。百咏百歌淑氣揚。門內好風惟洩洩。郡中懿範自洋洋。全因令德邀純嘏。詎有微誠格上蒼。闔壽齊坤四個字。天風吹到壽筵傍。四月朔日與亭甫設壽筵。南風忽作。吹一紙。

於亭上。拾之則刻書如掌大。首列闔壽齊坤四字。餘字多不成讀。存此以志老母平生盛德之感。

贈苗凌漢老儒

愛爾真儒者。安貧樂道深。老成人在目。慷慨話其心。腕下書堪寶。囊中易獨尋。公善大書。所有易酌。所升堂復遠去。

著作望佳音。

贈潘藏山隱者

又自烏龍出。升堂拜老慈。酒漿鄰里惠。瓜果歲時貽。有覺山人夢。無聲孝子詩。年來思靜侶。報與白雲知。

贈李晉陽貢士

十載西洪覓友生。攜詩又過蔚州城。知君不遠桑乾水。曲盡升堂拜母情。

贈徐次履文學

乍讀奚囊絕妙詞。年華恰在棄繻時。通家一見真嫌晚。爲愛孫郎帳下兒。

戊申八月十五日秋分。是夜雨。時聞災異求言之諭。有感。

百年幾看中秋月。況復秋從此日分。林壑豈能窺變理。歲時恰好罷耕耘。封疆自隕臣工業。宵旰偏勞聖主勤。異變驚心齊魯甚。一封白簡未曾聞。時間東撫。貧劣。

和李吉津先生見寄元韻

一身東去已忘言。十載龍荒道自尊。口授生徒宗闕里。手攜書卷入關門。夢回謫客詩誰好。環賜孤臣旨尚溫。曾向泰山山下問。誤將佳話作啼痕。

孫鍾元先生惠詩爲老母八十壽次韻答謝

蘇門天地空無倚。眼角浮雲同敝屣。廿年遙望歲寒居。有客傳來洛陽紙。南陔白華孝子詩。開械頌母慈顏喜。憶昔曾讀講學書。雪在程門不踰咫。一言一行海內師。問道有人何必已。予也五十愧虛生。矻矻終年窮四子。八十高堂菽水餘。尊聞行知盡此耳。安得一月坐春風。看徧千紅與萬紫。

戊申十月。王蓼航同年惠將母歌爲老母八十壽。是歲太夫人同八十。奉和近體二章。一補進觴。一奉懷柿菴二首。

太行相望白雲停。身傍萱闈戀闕廷。秋過大河千樹碧。夢回東苑一編青。長林竟夜分藜火。兩地經時看婺星。吾輩駐顏文字在。不須燕市買參苓。

曾向東華聽玉珂。共君先後入煙蘿。月明狐口同人隔。星聚蘇門好事多。梁苑屐痕歸霧豹。汴城秋色上銅駝。年來臥雪餐雲罷。一坐春風更若何。時孫鍾元徵君講學蘇門山中。

次徐雲門憶蔚韻四首奉懷

一回相見一聯牀。歸去翛然臥草堂。開卷幾曾分內外。閉關無處著閒忙。墨池雲懶吟常足。籬菊秋深采

自香。正是春風零水亞。可來鄒魯認宮牆。

不衫不履芥園居。月露風雲總緒餘。舊執還多誰入社。中年已過合懸車。酬君好夢松間石。慰我平生嶽

下書。幾向白登深處問。晚年歲月莫成虛。

同春亭上惜交遊。愛爾閒登百尺樓。世事紛紜隨夢鹿。吾心寂寞付江鷗。圖書氣合真無字。菽水情深幸

有秋。近日歌詩兒亦和。詩成那解是還不。

天地無窮道不窮。那曾一月坐春風。眼中人物憐君老。海內文章笑我空。兩世通家看後輩。千秋大業問

天公。往來多少嘔心語。化作煙雲護藥籠。

哭刁蒙吉先生二首

十一月二十九日訃至。爲位於授經堂哭之。

問病人歸訃已先。披衣讀罷淚雙懸。吾儒豈合斯人死。永訣仍存未了緣。鴈字投交辛丑後。麟書絕筆戊

申前。好將劄記名山護。獨破禪宗翼聖傳。

麻衣哭母病相侵。易篋終違枕塊心。有子有孫天地憾。無官無爵日星臨。百年公論歸吾黨。半句讒言是

好音。儻得先生靈爽至。窗前一聽伯牙琴。

冬杪答成我存燈下見懷詩次韻

一代儒宗推輦下。空來北地覓津梁。時當力學官爲隱。性不趨炎暑自涼。伊洛淵源今日續。尼山嫡派幾

人倡頻年未得同心語。轉眼春風看綠楊。

李桂萼內姪惠水仙花爲老母供賞二首

香風嬈嬈影翩翩。傲玉淩霜是水仙。爲報萱闈春色好。一枝獨立塞雲邊。  
荆園歲歲長名葩。來自江南種更嘉。昨夜春寒寒未歇。和風和雪到吾家。

同徐雲門李蓬萊過柳林

一派風煙萬柳深。高朋賢主足登臨。枝枝葉葉難窮處。想見當年種樹心。  
種樹者。余姻家李文明也。

同徐雲門渡桑乾二首

長河自西來。萬頃白如練。俯仰百尺樓。大塊之一線。  
往來涉大川。栗栗生恐懼。歸去報慈闈。世境難跬步。

過小關嶺。同雲門衝風而行。次南曠見贈韻。己酉四月十五日

四月披裘度小關。緋桃處處亂煙鬟。無言說夢心難穩。  
夜夢母病。驚覺。遂不復寐。有客同歸意自閒。一部河山隨我過。  
十年風雨共君刪。平生竊望山能學。不信山中更有山。

己酉孟夏雲門枉過庸齋。值七十六初度。率筆爲壽。

七十六歲老處士。一百餘里來高蹤。明月正懸北堂脊。長河自盤西嶺衝。開卷弄詩視而笑。舉觴言壽涼。



以恭遙知故園庭草綠。兒孫羣望蔚蘿峯。

雲門既歸白登。次見別韻卻寄。

嶺上諸峯斷復連。大河明滅望中懸。千紅萬紫來時興。一日三秋別後年。窗草日隨庭樹發。青箱夜共白雲卷。臨歧多少真憂喜。未敢題詩附錦韉。時老母抱病。

輓馮恆山侍御。時聞秋水方伯訃。

草土空餘病一身。哭君兄弟倍傷神。迴思同列趨朝日。不見當年鐵面人。

弔喬母卽慰喬生

內則條條古令儀。吾家壺範爾家知。可憐哭母輿亭日。又是喬生哭母時。余建輿亭。喬生董之。

輓應州左翼宸前輩用己亥贈答韻

聞君臥病在冬初。歲暮平安信已疏。忽見鄉人傳遠訃。可憐孫子抱遺書。一生清白惟茅屋。八袞窮愁但野蔬。幸得有棺函素骨。銘旌和淚託雙魚。

輓李繪先學士二首

學士論交一味真。素心耿耿對秋旻。憶君辛卯衡文事。猶是中流砥柱人。聞說功名念已灰。尊鱸常愛碧雲隈。如何臥病秋江上。箕尾飄然去不迴。

輓袁九敘同年巡撫山左卒於官

用己亥贈余  
歸養元韻

節鉞重開撫二東。清操惠政許誰同。百年鼎望歸梧鳳。數載深勞起澤鴻。風雨漫催雙鬢老。弟兄真惜此人空。回思藤館分襟日。蕭索秋心寄野蓬。公初撫滇。

輓曹孝子廣攄

順天大興人。翼宸先生仲子也。

幾年都下缺寒溫。客到爭傳孝子門。一念告天霜作刃。三更和藥血留痕。全歸全受心何憾。無古無今道自存。定有英魂依母側。時來隱隱慰晨昏。

妻兄李恆嶽仁里八景各賦一詩

平觀翠岫與丹楓。一望東南眼界空。分我半間新屋子。有時來坐白雲中。懸崖曉望長天漠漠晚陰陰。大壑飛湍百尺深。夜半濤聲來枕上。猛然驚起讀書心。夏雨澗濤四月邊城秀麥禾。滿疇搖曳綠痕多。主人自有躬耕樂。雨雨風風醉碧蘿。平疇麥浪拂雨搖風薜荔俱。垂垂古堞晚香殊。天生一幅黃花譜。寄與陶家作畫圖。古砦牆花月度榆關別有天。半鉤纔掛碧雲邊。不知峯下詩人宅。多少清光到榻前。臺峯新月石門煙火一村餘。中有幽人世卜居。試向砦樓高處望。幾家密密幾家疏。晚堡炊煙素雨漫漫向夕催。半秋秋色老崔嵬。分明摩詰詩中畫。畫出蒼山白雪來。秋山初雪

塞上春深柳放黃。殘冬猶自飽清霜。可憐數點寒鴉過。飛向枝頭坐夕陽。陽坡凍柳

送女子歸西洪。因與雲門期會李晉陽齋中。

報書曾與老翁期。卽約桑乾再渡時。仕宦情因華鬢改。婚姻事許故人知。冰橋五里溫將泮。煙柳千枝嫩欲垂。此夜文樓高百尺。焚香坐看斗杓移。

余將入都。次雲門元韻。預祝八十兼別。

仙骨稜稜望八春。披裘帶雪馬駢馳。知君古道憐朋友。願我虛名愧子臣。嘉會已從期會得。離情翻逐宦情新。青山白水真元氣。好助愚狂叩玉宸。

蔚州佟侯贈朝衣一襲爲贖賦謝。

病解朝衣分所安。綸音飛下五雲端。平生愧讀長沙傳。垂老新彈貢禹冠。樗櫟豈堪栽上苑。鴛鴦那敢附和鸞。多君贈我朝天服。滿袖爐煙聖主看。

壬子七月病餘奉召入都別鄉中親友二首

十年菽水兩朝恩。母去空留視息存。心憶北堂終有憾。夢回丹闕更何言。田園好辦租兼稅。兒女粗完嫁與婚。一綫殘軀那敢愛。排雲咫尺叩天門。

山色空濛柳色殊。蕭蕭匹馬自躊躇。宵衣旰食眞英主。摘句尋章一腐儒。門內有人祠祖父。口中無語別

妻孥九重若鑿微臣老定許知章乞鑑湖。